

2017

Aktiviteti Institucional i FSHZH-së

RAPORT VJETOR

Programet e Investimeve

Realizimi Financiar

Projekte te reja

Auditi i Brendshëm

Monitorimi & Vlerësimi

Ndërtimi i Kapaciteteve

Komunikimi & Informimi



FONDI SHQIPTAR I ZHVILLIMIT
ALBANIAN DEVELOPMENT FUND

SHKURTIME

AB	Auditi i Brendshëm
AKUK	Agjencia Kombëtare e Ujësjetllës Kanalizimeve
BB	Banka Botërore
BERZH	Banka Europiane për Rindërtim dhe Zhvillim
BEI	Banka Europiane e Investimeve
CDF	Community Development Fund
CEB	Banka e Këshillit të Europës
DZHR	Departamenti i Zhvillimit Rajonal
FK	Fondi Kuvajtian
FS	Fondi Saudit
FSHZH	Fondi Shqiptar i Zhvillimit
FUZR	Furnzimi me Ujë e Zonave Rurale
FZHR	Fondi për Zhvillimin e Rajoneve
GoA	Government of Albania - Qeveria Shqiptare
IDA	Agjencia Ndërkombëtare për Zhvillim
IDB	Banka Islamike e Investimeve
IPA	Instrumenti i Ndhmës së Paraaderimit Assistance
KD	Komiteti Drejtues
KfW	Banka Gjermane për Zhvillim
KZHR	Komiteti për Zhvillimin e Rajoneve
MIS	Sistemi i Menaxhimit të Informacionit
MZHETTS	Ministria e Zhvillimit Ekonomik, Turizmit, Tregëtisë dhe Sipërmarrjes
NSPP	National Single Project Pipeline
NTA	Norway Trust Account
NJQV	Njësitë e Qeverisjes Vendore
NJAB	Njësia e Auditimit të Brendshëm
OFID	Fondi i OPEC për Zhvillim Ndërkombëtar
PBA	Projekt Buxheti Afatmesëm
PK	Punët në Komunitet
PKST	Plani Kombëtar Sektorial i Turizmit
QSH	Qeveria Shqiptare
SIF	Fondi i Investimeve Sociale
ToR	Terma Reference
WBIF	Kuadri i Investimeve për Ballkanin Perëndimor (Western Balkans Investment Framework)

Pasqyra e lëndës

1.	PËRMBLEDHJE	4
2.	Bashkëpunimi i FSHZH me Fondin e Zhvillimit të Rajoneve në kuadër të Projekteve të Infrastrukturës Vendore.....	10
3.	Projekti i Rehabilitimit të Segmenteve Rrugore Prioritare	12
4.	Investime të Qeverisë Shqiptare 2015-2016	13
5.	Programi Punët në Komunitet IV “Zhvillimi i Alpeve Shqiptare dhe Zonës Bregdetare”	14
5.1.	Masterplani i Alpeve	15
6.	Rikonstruksioni i rrugës së Lumit të Vlorës	16
7.	Projekti për Zhvillimin e Integruar Urban dhe Turizmin (PZHIUT)	17
8.	Programi i Furnizimit me Ujë të Zonave Rurale	20
8.1	“Furnizimi me Ujë i Zonave Rurale III”	20
8.2	“Furnizimi me Ujë i Zonave Rurale”, SIF IV	22
9.	Programet e financuara nga IPA, Bashkimi Evropian	24
9.1	Vija bregdetare e qytetit të Vlorës - Lungomare	24
9.2	IPA 2012 – Përmirësimi i aksesit në shërbimet publike për grupet vulnerable në zonat periferike në qytetet Tiranë dhe Durrës	24
9.3	Programet e CBC/IPA, financuar nga BE	24
10.	Përgatitja dhe aplikimi për projekte të reja	25
11.	AKTIVITETI INSTITUCIONAL.....	27
11.1	Menaxhimi Financiar.....	27
11.2	Komunikimi dhe Marrëdhëniet me Publikun	36
11.2.1	Forcimi i imazhit.....	36
11.3	Monitorimi dhe Vlerësimi	40
11.4	Auditimi i brendshëm	41
11.5	Misione të donatorëve	42
12.	AKTIVITETE TE TJERA.....	43
12.1	Bashkëpunimi rajonal	43

1. PËRMBLEDHJE

Viti 2017 ka qenë një vit i rëndësishëm për Fondin Shqiptar të Zhvillimit pasi shënon rritje në aspektin e portofolit financiar që është shoqëruar me rritje konceptuale të institucionit.

Tre janë drejtimet në të cilat FSHZH është angazhuar gjatë vitit 2017:

- Aplikimi i një qasjeje të re territoriale në konceptimin dhe zbatimin e projekteve;
- Konsolidimi i marrëdhënieve me Qeverinë Shqiptare dhe palët e tjera financuese, duke u fokusuar në plotësimin e pritshmërive të larta ndaj Fondit Shqiptar të Zhvillimit;
- Forcimi i imazhit publik të FSHZH si një institucion që udhëhiqet nga vlera themelore si profesionalizmi, përgjegjshmëria, integriteti, transparencja dhe që punon me përkushtim e seriozitet për të transformuar politikat e zhvillimit të Qeverisë në rezultate konkrete.

Me një përvojë 25 vjeçare, FSHZH mbështet Qeverinë Shqiptare për të përbushur objektivat e saj për zhvillim të integruar e harmonik të vendit duke përdorur të gjithë ekspertizën që ka në fushën e planifikimit dhe zbatimit të programeve rajonale në infrastrukturë, urbanizim, turizëm, bashkëpunim ndërkufitar.

Viti 2017 shënon buxhetin më të madh në historinë e institucionit edhe si rezultat i transferimit të fondeve të Fondit të Zhvillimit të Rajoneve pranë FSHZH-së. Buxheti faktik për vitin 2017 për institucionin është rreth 111.6 milionë Euro ose dyfishi i buxhetit mesatar vjetor i 5 viteve të fundit. Si rrjedhojë edhe investimet e realizuara gjatë këtij viti janë 2 herë më shumë se mesatarja e investimeve për periudhën 2012 - 2016, ose 3 herë më të larta se viti 2016. Trendi rritës i buxhetit dhe investimeve të kryera nga FSHZH, është shoqëruar me stabilitet të kostos operative.

Gjatë vitit 2017 FSHZH ka menaxhuar 7 programe investimesh ose rreth 150 objekte të infrastrukturës dhe është duke iniciuar disa programe të reja.

Këtë volum pune FSHZH ka mundur ta përballojë falë strukturës së re organizative që ka pasur për synim përdorimin me efektivitet të burimeve të veta njerëzore, një staf profesionistësh me përvojë dhe të përkushtuar. Si rezultat, Fondi Shqiptar i Zhvillimit ka mundur të ofrojë shërbime të shpejta, fleksibël, efikase dhe me kosto të ulët. Janë realizuar sipas standardeve më të larta projekte komplekse dhe impakt të qënësishëm në mirëqenien e qytetarëve.

Gjatë punës së tij për zbatimin e projekteve gjatë këtij viti FSHZH ka pasur mbështetjen e plotë të Qeverisë Shqiptare dhe institucioneve financiare ndërkombëtare. Përmes financimeve të Qeverisë Shqiptare, Bankës Botërore, KfW, Bankës së Këshillit të Europës për Zhvillim, Fondit Kuvajtian etj, po mundësohen investime të rëndësishme në të gjithë vendin dhe me impakt të drejtpërdrejtë në jetën e banorëve. Janë më shumë se 1 milion banorë në të gjithë vendin të cilët kanë përfituar drejtpërdrejt nga investimet e FSHZH gjatë vitit 2017.

Koordinimi shumë i mirë dhe bashkëpunimi konstant dhe transparent me partnerët në nivel qendror dhe lokal konsiderohet një nga çelësat e suksesit të institucionit në performancën e këtij viti.

Në të gjitha misionet e zhvilluara gjatë vitit 2017, donatorët kanë shprehur vlerësim maksimal për aktivitetin e FSHZH dhe si rrjedhojë janë hapur perspektiva të reja bashkëpunimi për financimin e projekteve zhvillimore në të ardhmen e afërt.

Në këtë raport paraqiten drejtimet kryesore të punës së FSHZH gjatë vitit 2017:

- Menaxhimi financiar;
- Ecuria e projekteve në zbatim;
- Përgatitja e projekteve të reja për financim;

Projekte aktuale

Gjatë vitit 2017, investimet e kryera nga Qeveria Shqiptare në kuadër të **Fondit për Zhvillimin e Rajoneve dhe Projektit për Rehabilitimin e akseve Rrugore Prioritare**, zënë peshën më të madhe të investimeve të kryera nga FSHZH me rreth 84 % të buxhetit të realizuar. Ecuria e investimeve fizike ka qenë e kënaqshme dhe në fund të kësaj periudhe në kuadër të FZHR, rezulton se punimet civile kanë përfunduar në pjesën më të madhe të objekteve.

Rreth 70 milionë Euro janë akorduar nga Qeveria Shqiptare për **Rehabilitimin e akseve Rrugore Prioritare** në të gjithë vendin.

Ky projekt ambicioz ka nisur në fillim të vitit 2017 dhe parashikon ndërtimin e 180 kilometrave rrugë për një periudhë trevjeçare.

Këto investime do të mundësojnë lidhjen me rrugë të standardeve europiane të dy ose më shumë rajoneve me njëri-tjetrin, do të përmirësojnë lëvizjen në qendrat urbane përmes unazave të qyteteve dhe rrugëve hyrëse. Punimet kanë filluar në të gjitha segmentet rrugore dhe vijnë sipas planit të zbatimit të projektit. Ecuria është kënaqshme dhe realizimi fizik i punimeve ka arritur në rreth 63 përqind. Punimet civile kanë përfunduar në 6 segmente rrugore dhe pjesa tjetër e rrugëve parashikohet të përfundojnë gjatë vitit 2018.

Punë intensive është zhvilluar edhe për zbatimin e programit **për Zhvillimin e Alpeve Shqiptare dhe Zonës Bregdetare të vendit**, i cili mbështetet financiarisht nga CEB dhe Qeveria Shqiptare. Në kuadër të zbatimit të këtij projekti gjatë vitit 2017, ka vijuar puna për përgatitjen e procedurave të tenderimit, kontraktimit dhe zbatimit të punimeve civile për 13 kontrata punimesh civile në Vlorë, Himarë, Gjirokastrë, Ulëz dhe Pukë.

Aktualisht kanë përfunduar punimet civile për fazën e parë të Rikualifikimit Urban në Bashkinë Vlorë dhe Restaurimin e fasadave dhe rikualifikimin e qendrës Gjirokastrë. Ndërkohë vijon puna në 9 objekte të tjera infrastrukturore. Në fazën e tenderimit dhe kontraktimit janë edhe 3 objekte të tjera, të cilat parashikohet të fillojnë nga puna në fillim të vitit 2018. Nga ana tjetër ka përfunduar hartimi i masterplanit të Alpeve që do të jetë baza për identifikimin e ndërhyrjeve prioritare në këtë zonë. Plani Kombëtar Sektorial i Turizmit për Alpet shqiptare u miratua nga Këshilli Kombëtar i Territorit, më 9 dhjetor 2017. Ky plan bashkë me studimin për kërkesën turistike, programin e investimeve për infrastrukturën vendore dhe strategjinë e marketingut turistik përbëjnë Masterplanin e Alpeve.

Muaji Qershor 2017, shënoi përfundimin e punimeve të **Shëtitorës Bregdetare në Vlorë**, një projekt model i zhvillimit urban në vend. Në këtë projekt kompleks, FSHZH kishte një rol primar jo vetëm në koordinimin e komponentëve të projektit, por edhe në zbatimin korrekt dhe cilësor të punimeve, për komponentët e financuar nga Qeveria Shqiptare, rikonstruksioni i rrugës, ndërtimi i shëtitorës, sheshet publike dhe elementët e arredimit urban.

Rruga e Lumit të Vlorës, ka siguruar financimin e nevojshëm dhe nisur puna në terren për zbatimin e punimeve civile. Pas nënshkrimit të Marrëveshjes së Kredisë me Fondin Kuvajtian në mars 2016, janë siguruar 51 milionë USD (përfshirë 40 milionë USD kredi nga Fondi Kuvajtian dhe 11 milionë USD, kontribut i Qeverisë Shqiptare). Gjatë vitit 2017, është lidhur kontrata e punimeve për Lot-in e parë dhe ka filluar puna në terren. Ecuria është e kënaqshme dhe punimet janë realizuar në masën 60 përqind.

Paralelisht është punuar për përgatitjen e dokumentave të tenderit për parakualifikimin, për punimet për segmentet e mbetura të këtij financimi.

Në këtë kuadër edhe Fondi Saudit për Zhvillim do të financojë rreth 30 milionë USD që do të përdoren për financimin e pjesës e dytë të rrugës së Lumit të Vlorës, duke plotësuar kështu të gjithë financimin e nevojshëm për ndërtimin e rrugës.

Është aprovuar nga Fondi Kuvajtian për Zhvillim Arab një grant për Asistencë teknike, me vlerë rreth 700 mijë USD dollarë. Granti do të përdoret për të përgatitur një masterplan për zhvillimin e bregdetit të jugut me fokusin kryesor në investimet në infrastrukturë. Në përfundim të këtij studimi do të gjenerohen projekte të gatshme në shumën rreth 30 milionë dollarë, të cilat mund të paraqiten tek donatorët me qëllim mundësimin e financimit.

Projekti për Zhvillim të Integruar Urban dhe Turistik u bë zyrtarisht efektiv në fund të prillit 2017 dhe do të ketë një kohëzgjatje 5-vjeçare deri në Korrik të vitit 2022. Ai financohet nga Banka Botërore në vlerën 63.8 milionë Euro (me TVSH), dhe shtrihet në qendrat urbane të Sarandës, Gjirokastrës, Beratit, Përmetit si dhe përgjatë korridorit turistik që kalon në këtë rajon.

Gjatë kësaj periudhe FSHZH ka punuar intensivisht me ekipin e Bankës Botërore dhe MZHU me qëllim përgatitjen e gjithë dokumentacionit të nevojshëm (Dokumenti i Vlerësimit të Projektit, Plani i Prokurimeve, Dokumenti Kuadër për Politkat Mjedisore e të Shpronësimeve, Manuali Operacional i projektit etj.) për aprovimin e projektit në Bordin e Bankës Botërore dhe në Qeverinë Shqiptare. Një sërë punësh përgatitore janë kryer për lehtësimin e fillimit të menjëhershëm të zbatimit të projektit. Aktualisht janë shpallur tenderat dhe janë lidhur kontratat për punime civile për dy objekte dhe vijon puna me hartimin e projekteve teknike dhe përgatitjen e dokumentacionit për tenderimin e punimeve për objekte të tjera. Punimet në terren për kontratën e parë kanë filluar në Dhjetor 2017. Parashikohet që viti 2018 të shënojë fillimin e punimeve civile në terren për pjesën më të madhe të objekteve.

Projekti "Furnizimi me Ujë i Zonave Rurale III", parashikon ndërhyrje në shkallë të gjerë në të gjithë vendin. Në këtë kuadër u ngrit një skemë e tërë aplikimesh ku u ftuan të merrnin pjesë gjitha bashkitë e vendit. Aktualisht ka përfunduar përgatitja e fizibiliteteve teknike, sociale dhe mjedisore për 30 skema, nga të cilat 19 prej tyre kanë rezultuar fizibël. KfW ka dhënë miratimin për 16 skemat e para dhe pritet miratimi i 3 skemave të tjera shtesë. 16 nga skemat e miratuara janë në fazën e projektimit. Puna në terren për ndërtimin e ujësjellësave do të organizohet në Lot-e dhe parashikohet të fillojë me përfundimin e projektit teknik të Lotit I, gjatë gjashtëmujorit të parë të vitit 2018.

Projekte të reja

Projekti i Rrugëve Lidhëse Rajonale, parashikon ndërhyrje në rrjetin rrugor rajonal në zona me potencial bujqësor dhe turistik në të gjithë vendin. Ai do të financohet nga Banka Botërore me vlerë të pritshme financimi 50 milionë USD. Projekti parashikohet të bëhet efektiv në 2018 dhe të ketë kohëzgjatje 5 vjeçare.

Projekti për Zhvillimin e Integruar të Zonave me Potencial Turistik, parashikon investime të projekteve strategjike rajonale në zonat e Shkodrës, Korçës, Divjakë-Fier, Durrës-Kavajë, Pogradec e Përmet. Projekti do të financohet nga BERZH dhe IPA me vlerë të pritshme financimi 100 milionë Euro dhe parashikohet të ketë kohëzgjatje 4 vjeçare.

Projekti Furnizimi me Ujë i Zonave Rurale IV, i cili parashikon ndërhyrje të plota në të gjithë sistemin e furnizimit me ujë dhe atë të ujërave të zeza, ndërtimin e një impianti për trajtimin e ujërave të zeza në Bashkinë Himarë dhe qytetin e Orikumit. Ai do të financohet nga KfW, WBIF, Qeveria Shqiptare, me vlerë të pritshme financimi 53 milionë Euro. Projekti parashikohet të bëhet efektiv në 2018 dhe të ketë kohëzgjatje 5 vjeçare.

FSHZH gjatë vitit 2017 është përzgjedhur si partner në **6 projekte të financuara nga Programet CBC/Bashkëpunimit Ndërkufitar**. Këto projekte nga të cilat 5 financohen nga Programi Adrion dhe 1 nga Programi Shqipëri Kosovë kanë fokus zhvillimin turistik dhe inovacionin në mjedis. Projektet në total kanë një vlerë prej 1 Milion Euro dhe pritet të fillojnë zbatimin në fillim të vitit 2018.

Aktivitete të tjera

Gjatë kësaj periudhë në bashkëpunim me Bashkitë përfituese, FSHZH ka ndjekur përgatitjen e një sërë projektesh të rëndësishme të rikualifikimit urban në shumë bashki të vendit. Kjo skemë e financuar nga Qeveria Shqiptare dhe bashkëfinancuar nga Bashkitë ka qenë shumë e sukseshme për përgatitjen e projekteve cilësore të financuara në vijim nga FZHR.

Duke e vlerësuar bashkëpunimin rajonal esencial për një zhvillim të qëndrueshëm, FSHZH është angazhuar në programe të bashkëpunimit ndërkufitar, duke i konsideruar si një mundësi integrimi me strukturat homologe europiane, përqasjen e standarteve në fusha me rëndësi për zhvillimin, si turizmi, kultura, inovacioni etj. FSHZH gjatë vitit 2017 është përzgjedhur si partner në 6 projekte të financuara nga Programet CBC/Bashkëpunimit Ndërkufitar. Këto projekte nga të cilat 5 financohen nga Programi Adrion dhe 1 nga Programi Shqipëri Kosovë kanë fokus zhvillimin turistik dhe inovacionin në mjedis. Projektet në total kanë një vlerë prej 1 Milion Euro dhe pritet të fillojnë zbatimin në fillim të vitit 2018.

Buxheti faktik për vitin 2017 për institucionin është rreth 111.6 milionë Euro. Gjatë vitit 2017, buxheti është realizuar në masën 97 % ose rreth 108.5 milionë Euro. Investimet gjatë kësaj periudhe janë realizuar në masën 102.4 milionë Euro ose rreth 98 % e buxhetit faktik.


Përgjithësisht ka ecuri të mirë të projekteve në proces zbatimi, të cilat kanë nivel të kënaqshëm të realizimit të investimeve.

Gjatë këtij viti, ka vijuar informimi publik përmes mediave vizive dhe atyre të shkruara, nëpërmjet së cilave është siguruar dhe njohja e gjerë e publikut me rezultatet e punës së FSHZH-së, si dhe aktivitetet në vijim.

Vlen për t'u theksuar se gjatë këtij viti ka vijuar bashkëpunimi intensiv dhe i suksesshëm me ministrinë e linjës dhe agjensitë shtetërore.

Paraqitja e nënprojekteve sipas donatorëve dhe statusit të tyre Dhjetor 2017

Programi	Donatori	Totali	Projekte në fazën e përgatitjes së dokumentacionit	Në tenderim / vlerësim	Në kontraktim	Në zbatim	Projekte të përfunduara Në Garanci
Qeveria Shqiptare 2014 – 2015 (FZHR)	QSH	58				1	57
Qeveria Shqiptare investime 2016	QSH	3				2	1
Rehabilitimi i segmenteve rrugore prioritare Qeveria Shqiptare 2017-2019	QSH	24				18	6
Punët në Komunitet IV	CEB	14		1	2	9 ¹	2
Rehabilitimi i rrugës së Lumit të Vlorës	FK & FS	4	2	1		1	
Projekti për Zhvillimin e Integruar dhe Turizmin	BB	11	8	1	1	1	
KfW (SIF IV) Komponenti Ujësjellës	KfW	17					17
Furnizimi me Ujë i Zonave Rurale III	KfW, IPA 2013, GoA	19 ²	19				
(Lungomare)	IPA 2013	1					1
TOTALI		151	29	3	3	32	84



¹ Në kuadër të PK IV, janë në proces zbatimi 9 objekte infrastrukturore, ndërkohë për një objekt tjetër, puna parashikohet të fillojë së shpejti.

² Nga 30 skema ujësjellësash të propozuara, 19 prej tyre kanë dalë të bëshme dhe aktualisht 16 prej tyre janë në fazën e hartimit të projekteve teknike.

2. **Bashkëpunimi i FSHZH me Fondin e Zhvillimit të Rajoneve në kuadër të Projekteve të Infrastrukturës Vendore**

Fondi i Zhvillimit të Rajoneve ka shënuar një transformim të rëndësishëm, nga një instrument financimi i projekteve të vogla me impakt të kufizuar, drejt financimit të projekteve më të mëdha me ndikim rajonal, në funksion të vizionit të transformimeve urbane të qendrave të qyteteve të mëdha.

Duke vlerësuar kapacitetet dhe performancën e lartë të FSHZH-së, për periudhën 2014 - 2016, Qeveria Shqiptare i ka akorduar zbatimin e 58 objekteve të ndryshme infrastrukturore dhe 6 projekte studimore me një vlerë totale prej rreth 8.18 miliardë Lekë. 57 objekte infrastrukturore kanë përfunduar dhe kanë kaluar në periudhë garancie. Pjesa më e madhe tyre janë mbyllur përfundimisht gjatë vitit 2017 dhe u kanë kaluar njësisë të qeverisjes vendore përfituese për t'i vënë në shfrytëzim të komuniteteve të tyre. Në 1 objekt tjetër punimet janë në proces dhe pritet të mbyllet gjatë vitit 2018.

2.1.1 **Zbatimi i projekteve të akorduara nga FZHR për periudhën 2014 - 2016**

Fondi Shqiptar i Zhvillimit gjatë periudhës 2014 - 2016 ka përfituar nga Fondi për Zhvillimin e Rajoneve një fond investimesh në një vlerë totale prej rreth 8.18 miliardë Lekë. Këto financime janë të fokusuar në disa drejtime prioritare:

- (i) 39 projekte për përmirësimin e infrastrukturës rrugore dhe asaj urbane, (Hyrjet e Tiranës nga Durrësi dhe Elbasani, Sistemimi i 2 shesheve në Tiranë, Unaza e Divjakës, Rruga Transballkanike në Vlorë, Mbushja me rërë e plazhit Vlorë, Rruga Dhimitër Konomi Vlorë, Rruga e Dajtit, Sheshi i Kukësit, Shëtitorja Himarë, etj.);
- (ii) 5 projekte të furnizimit me ujë (ujësjellësat në Sarandë, Dhërmi, Ksamil);
- (iii) 10 projekte mjedisore dhe gjelbërimi (Pyllëzimi i Krastës në Krujë, Gjelbërimi i aksit rrugor Plepa - Vlorë, Gjelbërimi i vijës bregdetare të Vlorës dhe Parkut të Liqenit Artificial në Tiranë; Gjelbërimi i aksit Levan - Kakavijë, Lushnje - Berat, Gjelbërimi i aksit IKV - Surrel, dhe Segmentit Lin - Pogradec, etj.);
- (iv) 4 projekte arsimore përmes të cilave u mundësua rikonstruksioni i disa shkollave, si: Shkolla e mesme e bashkuar Tunjë, Gramsh; Shkolla 9-vjeçare në fshatin Sheq të Frakullës; Shkolla 9-vjeçare në Toshkëz, NjA Allkaj; Shkolla 9-vjeçare Dërsnik, NjA Voskop;
- (v) 6 projekte studimore, trashëgimi kulturore dhe të dhëna gjeohapësinore (përgatitja e projektit teknik për Lungomaren, Restaurimi dhe Muzealizimi i Fototekës Marubi, projekti i krijimit të të dhënave gjeohapësinore për mbështetjen e zhvillimit rajonal, përgatitjes së projekteve për vitin 2015 - 2016, Hartimin e studimeve dhe projekt-ideve për projektet urbane, ku përfshihen realizimi i masterplanit të Qytetit Studenti, masterplani i Parkut të Liqenit Artificial, projekt-ideja për Ishullin e Osumit, supervizioni estetik i Lungomares, etj.

Projektet e infrastrukturës rrugore dhe urbane. Punimet kanë përfunduar në të gjitha objektet.

Projektet e furnizimit me ujë në zonën e Bregdetit të Jugut. Punimet kanë përfunduar në të gjitha skemat e ujësjellësave. Ujësjellësat kanë përfunduar periudhën e garancisë dhe u janë dorëzuar bashkive përfituese.

Projektet mjedisore. Punimet e mbjelljes së pemëve kanë përfunduar në 9 objekte, nga të cilat 2 janë mbyllur përfundimisht dhe 6 të tjera janë në periudhë mirëmbajtje. Në 1 objekt tjetër punimet janë në proces dhe pritet të mbyllen gjatë vitit 2018.

Projektet e rikonstruksionit të shkollave. Punimet kanë përfunduar në të gjitha shkollat. Objektet ndodhen në periudhën e garancisë së defekteve dhe pritet t'i dorëzohen për administrim bashkive përfituese gjatë vitit 2018.

Projektet studimore, hapësinore, të trashëgimisë kulturore, etj. Në kuadër të këtyre projekteve vlen të përmendet angazhimi i FSHZH-së në përgatitjen e disa projekteve të rëndësishme si përgatitja e projektit teknik të fazës së dytë të Lungomares, përgatitja e projektit bashkëkohor për restaurimin dhe muzealizimin e Fototekës Marubi, krijimi i sistemit të të dhënave gjeohapësinore për mbështetjen e zhvillimit dhe menaxhimit rajonal, hartimin e projekteve për zonën Tiranë - Durrës dhe Bregdetin e Jugut, përgatitja e projekteve të zhvillimit të zonave urbane, si dhe përgatitja e disa Master Planeve si ai i qytetit Studenti, i Parkut Sportiv në Korçë, i Parkut të Liqenit Artificial, projekti i rikonstruksionit e ndryshimit të destinacionit të ish-laboratorit hidraulik në Qendër Arti, etj.

2.1.2 Studime, Projekttime dhe Mbikqyrje për Fondin e Zhvillimit të Rajoneve 2016

Gjatë vitit 2015, Qeveria Shqiptare nëpërmjet Fondit të Zhvillimit të Rajoneve miratoi një fond i cili bashkëfinancon përgatitjen dhe hartimin e projekteve teknike për infrastrukturën vendore për periudhën 2016-2017. Qëllimi i këtij fondi është përgatitja në kohë dhe me cilësi e projekteve teknike të gatshme për financim nga Fondi i Zhvillimit të Rajoneve.

Në këtë kuadër studio projektimi, (që kanë në stafin e tyre arkitektë me eksperiencë ndërkombëtare), u angazhuan për hartimin sipas nevojës të projekt-ideve dhe projekteve të plota të zbatimit për zhvillimin e territorit të bashkive përkatëse.

Fondi Shqiptar i Zhvillimit ftoi 12 bashkitë qendër qarku për të marrë pjesë në procesin e konkurimit për përzgjedhjen e 6 bashkive.

Nga ky proces janë përzgjedhur Bashkitë Tiranë, Durrës, Vlorë, Korçë, Shkodër dhe Berat. Gjatë vitit 2017 ka vijuar me intensitet puna për përgatitjen e projekt-ideve dhe projekteve të zbatimit për bashkitë pjesëmarrëse. Në fund të këtij procesi është realizuar hartimi i projekteve teknike për 20 projekte prioritare.

Për Bashkinë Tiranë është dorëzuar projekt-zbatimi për "Rikualifikimin urban të Sheshit Skënderbej dhe Parkimin nëntokësor". Ky projekt ka përfunduar punimet civile në Qershor 2017.

Për Bashkinë Durrës janë dorëzuar projekt-zbatimet për projektet:

- Shëtitë bregdetare përgjatë plazhit tek "Shkëmbi i Kavajës si dhe lidhja e saj me monumentin historik natyror (landmark) – Shkëmbi i Kavajës" ;
- Itinerar i ri turistik në zonën historike të qytetit të Durrësit (Amfiteatër – Fari) ;
- Porta e Jallisë – Hamami ;
- Rikonceptimin dhe rikonstruksionin e Shkollës së Muzikës "Jan Kukuzeli";
- Rikonceptimin dhe rikonstruksionin e Qendrës Kulturore të Fëmijëve Durrës;
- Rindërtimin e shkollës 9-vjeçare "Jusuf Puka";
- Rivitalizimi i tregut fruta perime ;

Për Bashkinë Vlorë, janë dorëzuar projekt-zbatimet për projektet:

- Rikualifikimi i Bulevardit kryesor Ismail Qemali, në qytetin e Vlorës
- Rivitalizimi i zonave në të dyja anët e rrugës Transballkanike.

Për Bashkinë Korçë, është dorëzuar projekt-zbatimi për projektet:

- Qendra polifunkionale kreative”,
- Ndërtimi i Parkut Japonez & Kopshtet e Komunitetit
- Rikonstruksioni i muzeut të fotografise Gjon Mili;
- Kubi i Muzeut të fotografisë Gjon Mili;
- Rehabilitimi urban e lulishtes Lëndina e loteve;
- Rehabilitimi urban i parkut “Vangjush Mio”;
- Ndërtimi i muzeut të kohëve të harruara;

Për Bashkinë Shkodër, është dorëzuar projekt-zbatimi për projektin:

- Rikualifikimi i bregut perëndimor të Liqenit të Shkodrës.

Për Bashkinë Berat, është dorëzuar projekt-zbatimi për projektin:

- Qendra sportive argëtuese për femijë në qytetin e Beratit.

Të gjitha projektet teknike u janë dorëzuar bashkive respektive dhe pjesa më e madhe e tyre kanë përfunduar punimet civile ose janë në proces zbatimi. Për pjesën tjetër pritet që puna të fillojë së shpejti.

Për periudhën Janar - Dhjetor 2017, janë kontrolluar dhe ripunuar një seri projektesh teknike, përfshirë këtu edhe projektet e Fondit të Zhvillimit të Rajoneve.

Për të gjitha projektet janë plotësuar dosjet me projektin, preventivin dhe gjithë dokumentacioni përkatës.

3. Projekti i Rehabilitimit të Segmenteve Rrugore Prioritare

Gjatë vitit 2016, FSHZH në vijim të diskutimeve me Qeverinë Shqiptare ndërmori procesin e identifikimit dhe vlerësimit të segmenteve rrugore prioritare me impakt të lartë në zhvillimin ekonomik me objektiv përmirësimin e infrastrukturës rrugore.

Me qëllim identifikimin e segmenteve rrugore prioritare me impakt të lartë në zhvillimin ekonomik të vendit dhe detajimin e një liste investimesh prioritare për periudhën 2017-2019, u analizuan kërkesat që kanë ardhur pranë FSHZH-së dhe FZHR-së nga bashkitë, qarqet, përfaqësuesit e mandatuar të komuniteteve, etj, databaza për rrugët që ka ngritur FSHZH në kuadër të Programit të “Rrugëve Dytësore dhe Lokale”, financuar nga donatorë të ndryshëm (IDA, CEB, OPEC, IDB, Istisna'a, KfW, BERZH, BEI, IPA 2009/10/11) si dhe verifikimet në terren nga inxhinierët e FSHZH-së në segmentet rrugore prioritare dhe plotësimi i skedave individuale.

Pas hartimit të listës paraprake të investimeve, procesi vijoi me përcaktimin e segmenteve prioritare, bazuar në numrin e përfituesve, shkallën e degradimit të rrugës, rëndësinë e qarkullimit të mjeteve në nivel kombëtar, rajonal dhe lokal, akse rrugore të gatshme dhe pa probleme pronësie, kosto paraprake investimi, lidhja me një rrugë tjetër në gjendje të mirë.

Kjo listë përmban 20 segmente rrugore me vlerë të përafërt rreth 9.5 miliardë lekë, si:

- Cërrik - Belsh - Kuçovë - Ura Vajgurore;
- Harku i Bërdicës - Kryqëzimi Baks,
- Unaza Pogradec - Qafë Pllaçë,
- Unaza e Peshkopisë,
- Fushë Arrëz - Rreps (Rruga e Kombit),
- Fushë Krujë - Thumanë (aksi i vjetër),
- Shëtitorja në Golem (Mak Albania),
- Hyrja e Bajram Currit,

- Hyrjet e Rrogozhinës, etj.

Pas miratimit në Këshillin Drejtues dhe Ministrinë e Financave, u krye një punë intensive për plotësimin dhe standartizimin e projekteve teknike dhe shpalljen e procedurave të prokurimit.

Për vetë specifikën dhe rëndësinë e tyre akset, Cërrik-Belsh-Kuçovë-Ura Vajguore dhe segmenti Harku i Bërdices - Baks, janë ndarë me nga tre lote.

Gjatë vitit 2017, puna filloi në të gjitha segmentet rrugore dhe ecuria ka qënë e kënaqshme. Realizimi fizik i punimeve në terren arriti në rreth 63%. Fondet e vëna në dispozicion nga Buxheti i Shtetit për vitin 2017 janë realizuar në masën 100 përqind.

Punimet kanë përfunduar në 6 segmente rrugore:

- Grekan – Dragot, pjesë aksit Cërrik - Belsh - Kuçovë - Ura Vajguore;
- Gradishtë – Spolatë;
- Mërtish – Tre Urat;
- Rikonstruksioni i rruges hyrëse të qytetit Bajram Curri;
- Rruga Taulantët në Universitetin Bujqësor të Tiranës;
- Tre Hyrjet e Rrogozhinës;

Në segmentet e tjera parashikohet që punimet të përfundojnë brenda vitit 2018. Paralelisht me procedurat e prokurimit të punimeve, është shpallur edhe procedura e supervizionit, në bazë të së cilës janë përzgjedhur kompanitë që po mbikqyrin implementimin e punimeve në terren.

4. Investime të Qeverisë Shqiptare 2015-2016

Gjatë vitit 2016, Qeveria Shqiptare ka financuar 2 segmente rrugore në qarkun Gjirokastrë për rikonstruksionin e rrugëve Autostradë - Fshati Bulo dhe Tepelenë - Bençë - Lekdush, dhe ndërtimin e ujësjellësit Çermë - Tërbuf - Sulzotaj në qarkun Fier. Puna për përgatitjen e dokumentacionit dhe projekteve teknike ka nisur që në vitin 2015 dhe është finalizuar në vitin 2016 me lidhjen e kontratave për fillimin e punimeve civile.

Në shkurt 2017, kanë përfunduar punimet për rikonstruksionin e rrugës Autostradë - fshati Bulo. Ndërkohë janë drejt përfundimit punimet për rrugën Tepelenë - Bençë - Lekdush, dhe ndërtimin e ujësjellësit Çermë - Tërbuf - Sulzotaj. Parashikohet që punimet civile për këto objekte të mbyllën brenda tremujorit të parë të vitit 2018.

Prokurimi

Procedurat e prokurimit për financimet nga Qeveria Shqiptare janë kryer në përputhje me Ligjin Nr. 9643, datë 20.11.2006, "Për Prokurimin Publik", i ndryshuar, dhe Vendimin e Këshillit të Ministrave Nr. 914, datë 29.12.2014 "Për miratimin e rregullave të Prokurimit Publik", i ndryshuar dhe akteve ligjore e nënligjore që rregullojnë veprimtaritë përkatëse.

5. Programi Punët në Komunitet IV “Zhvillimi i Alpeve Shqiptare dhe Zonës Bregdetare”

Objektivi i projektit “Punët në Komunitet IV - Zhvillimi i Alpeve Shqiptare dhe Zonës Bregdetare” është nxitja e zhvillimit të qëndrueshëm social-ekonomik në komunitetet me potencial të lartë turistik, nëpërmjet përmirësimit të infrastrukturës së integruar publike duke respektuar mjedisin dhe ruajtur trashëgiminë kulturore dhe historike.

Komponentët e projektit janë:

- investime në infrastrukturë dhe shërbimet lokale publike (rikualifikim urban e rrugë, ujësjellës-kanalizime, menaxhim i mbetjeve urbane, etj);
- asistencë teknike & ngritje kapacitetesh (studime fizibiliteti, përgatitje strategjish lokale, hartim projektesh, trajnime).

Projekti me vlerë 36.7 milionë Euro bashkëfinancohet nga Banka për Zhvillim e Këshillit të Europës (CEB), Qeveria Shqiptare dhe NJQV-të përfituese, WBIF.

Burimet e financimit përfshijnë 28.7 milionë euro kredi nga CEB, 1 milion Euro grant nga CEB Social Dividend Account (SDA), një kontribut 6 milionë Euro nga Qeveria e Shqipërisë dhe NJQV përfituese, si dhe një 1 milion Euro grant nga WBIF. Parashikohet që dy të tretat e kostos së Programit të investohen në zonën bregdetare të Jugut dhe një e treta në zonën e Alpeve Shqiptare.

Marrëveshja e financimit midis Qeverisë Shqiptare dhe CEB për këtë projekt është firmosur në datë 21 Maj 2015 dhe është ratifikuar nga Parlamenti në datë 2 Korrik 2015. Projekti sipas marrëveshjes ka filluar nga puna në gjashtëmujorin e fundit të vitit 2015 dhe parashikohet të përfundojë në shtator 2019.

Përsa i përket komponentit të investimeve në infrastrukturë, kanë përfunduar punimet civile për:

- Rikualifikimin urban në Bashkinë Vlorë, faza e parë;
- Restaurimin e fasadave dhe rikualifikimin e qendrës Gjirokastrë;

Ndërkohë vijon puna për zbatimin e punimeve civile në terren për:

- Rikualifikimin urban në Bashkinë Himarë, faza e parë;
- Rigjenerimin urban të zonave bregdetare në fshatrat Jalë dhe Dhërmi;
- Rikualifikimin urban në fshatin Dhërmi;
- Rikualifikimin urban në fshatin Vuno;
- Rikualifikimin urban në Bashkinë Vlorë, faza e dytë Rikonstruksioni i Unazës Vlorë Lot 2, si dhe ndërhyrjet në bulevard dhe Lungomare;
- Rikonstruksionin e rrugës Port - Pylli i Sodës;
- Rikualifikim urban dhe mjedisor të qendrës dhe liqenit të Pukës
- Rikonstruksioni i rrugës së Kaninës;
- Rikonstruksioni i rrugës së Ulzës;

Janë në proces tenderimi dhe kontraktimi:

- Rikualifikimi urban në Bashkinë Himarë, faza e dytë;
- Rikonstruksioni i Bulevardit “Ismail Qemali”, Bashkia Vlorë;

Në proces rishikimi projekti teknik për:

- Rikonstruksionin dhe ndërtimin e infrastrukturës rrugore, parkimit dhe plazhit publik në Dhraleo;

Për të gjitha objektet që janë në fazë zbatimi kanë përfunduar procedurat e tenderimit dhe janë lidhur kontratat për supervizionin e punimeve. FSHZH është e angazhuar maksimalisht që punimet të përfundojnë brenda afateve të kontratave respektive. Sezoni i ardhshëm turistik do t'i gjejë këto zona me infrastrukturë të transformuar.

Përsa i përket komponentit të asistencës teknike dhe ngritjes së kapaciteteve, po punohet për realizimin e disa studimeve dhe organizimin e trajnimeve për Njësitë e Qeverisjes Vendore, në territorin e zbatimit të projektit. Në vitin 2015 janë hapur zyrat koordinuese në zonat e projektit.

5.1. Masterplani i Alpeve

Puna për hartimin e Masterplanit ka filluar gjatë vitit 2016 dhe përfundoi në Dhjetor 2017.

Ky projekt është financuar nga Banka për Zhvillim e Këshillit të Europës në kuadër të asistencës teknike të "Kornizës së Investimeve për Ballkanin Perëndimor" (WBIF).

Qëllimi kryesor i projektit është ofrimi i një plani zhvillimi social-ekonomik të qëndrueshëm për komunitetin e Alpeve Shqiptare si një nga zonat gjeografike me potencial të lartë të zhvillimit turistik.

Ai orienton zhvillimin e qëndrueshëm të zonës dhe i hap rrugë fillimit të investimeve të integruara me qëllim rritjen ekonomike të të gjithë rajonit përgjatë 15 viteve në vazhdim. Drejtimit kryesor të zhvillimit të zonës së alpeve sipas Planit Kombëtar Sektorial të Turizmit do të jenë: turizmi, zhvillimi rural, energjia, industria e lehtë, kulinaria, etj.

Në terma konkretë studimi orientohet drejt këtyre produkteve:

- Vlerësim i Situatës Aktuale dhe Kërkesa Turistike;
- Plan Kombëtar Sektorial i Turizmit;
- Propozim për Plan Marketingu;
- Program investimesh (studime fizibiliteti, projekte teknike) për projekte infrastrukturore lokale për kreditë e ardhshme CEB.

Plani Kombëtar Sektorial i Turizmit për Alpet shqiptare u miratua nga Këshilli Kombëtar i Territorit, më 9 dhjetor 2017.

Ky plan bashkë me studimin për kërkesën turistike, programin e investimeve për infrastrukturën vendore dhe strategjinë e marketingut turistik përbëjnë Masterplanin e Alpeve.

Zbatimi i këtij plani përgjatë 15 viteve, kombinuar me programin e investimeve për infrastrukturën vendore dhe strategjinë e marketingut turistik të zonës pritet të sjellë një përfitim ekonomik prej 980 milionë eurosh.

Numri i turistëve pritet të kapë shifrën rreth 600,000 brenda vitit 2031, ndërsa koha e qëndrimit pritet të zgjatet. Qasja rajonale e ndërhyrjeve në të gjithë zonën dhe në të gjithë zinxhirët e vlerës, si dhe ndërhyrjet minimaliste në pejsazhet natyrore janë dy elementë të veçantë mbi të cilët është ngritur ky projekt.

6. Rikonstruksioni i rrugës së Lumit të Vlorës

Projekti parashikon ti japë zgjidhje të qëndrueshme infrastrukturës publike në zonën e Bregdetit të Jugut, specifikisht në zonën e Lumit të Vlorës, duke kontribuar në përmirësimin e kushteve të jetesës për vendasit dhe ridimensionim e sektorit të turizmit si një nga shtyllat kryesore të ekonomisë lokale dhe rajonale.

Infrastruktura publike aktualisht nuk favorizon zhvillimin e ekonomisë dhe nuk ofron shërbime optimale për popullsinë vendase dhe turistët që frekuentojnë këtë zonë. Projekti ka si qëllim rikonstruksionin e rrugës së Lumit të Vlorës, e cila do të mundësojë lidhjen e dy rrugëve nacionale (SH4-SH8) dhe përfshin edhe një degëzim që mundëson lidhjen me qytetin e Vlorës.

Rruga e Lumit të Vlorës parashikohet të financohet në shumën 81.8 milionë USD, për gjatësinë e plotë të saj 94.2 km.

Pas negociatave me Fondin Kuvajtian është rënë dakort për financimin pjesor të rrugës, për gjatësinë 74 km me shumën 51.8 milionë pa TVSH (përkatësisht 40 milionë USD kredi nga Fondi Kuvajtian dhe 11.8 milionë USD, kontribut i Qeverisë Shqiptare).

Gjithashtu është finalizuar dhe Marrëveshja e Huasë me Fondin Saudit për rreth 30 milionë USD, të cilat do të përdoren për financimin e pjesës së mbetur të projektit. Është rënë dakort që një pjesë e këtij fondi të përdoret për segmentet që financohen nga Fondi Kuvajtian, nëse do jetë e nevojshme.

Projekti ka filluar në vitin 2017 dhe përfundon në vitin 2022.

Ardhja e një misioni vlerësues nga Fondit Kuvajtian për Zhvillim Ekonomik Arab, në Tetor 2015 i hapi rrugën diskutimeve dhe vlerësimit mbi mundësinë e dhënies së kredisë për rikonstruksionin e Rrugës së Lumit të Vlorës.

Gjatë vitit 2016, u evidentuan të gjitha hapat që duhet të ndërmerreshin për hartimin e grafikut të realizimit të projektit dhe përgatitjen e dokumentacionit të nevojshëm. Fillimisht u punua me përgatitjen e termave të referencës për Supervizionin e Punimeve, të cilat morën formën përfundimtare pas pasqyrimit të vërejtjeve dhe sugjerimeve të Fondit Kuvajtian dhe FSHZH. Marrëveshja e Kredisë është nënshkruar në 30 Mars 2016.

Është shpallur fituesi dhe kanë filluar punimet civile për lotin e parë By Pass Vlorë - Peshkëpi - Gjorm, me gjatësi 23.2 km. Kontrata është lidhur më 24.02.2017. Punimet në Lot-in e parë kanë vijuar normalisht përfshirë veprat e artit si dhe 1,600 ml asfaltim. Deri në Dhjetor 2017, ecuria e punimeve civile është në masën 60 përqind.

Gjithashtu është në proces tenderimi edhe loti i dytë i rrugës, Ura e Gjormit - Brataj - Ura e Laskos. Aktualisht ka përfunduar faza e parakualifikimit dhe pritët miratimi nga Fondi Kuvajtian. Parashikohet që kontrata e punimeve për këtë segment të lidhet në Mars 2018.

Përsa i përket Lotit të tretë, janë hartuar kriteret dhe parashikohet që shpallja e tenderit të bëhet në Shkurt 2018. Kontrata për këtë segment parashikohet të lidhet në Korrik 2018.

Proçesi i tenderimit për supervizionin është finalizuar dhe raporti final i është dërguar donatorit për aprovim për shpalljen e fituesit. Supervizioni për këtë investim mbulon

segmentet nga Bypass-i i Vlorës deri në Qeparo. Parashikohet që kontrata e supervizionit të lidhet në Janar 2018.

Fondi Saudit për Zhvillim do të financojë pjesën e dytë të rrugës së Lumit të Vlorës, e cila lidh fshatin Peshkëpi me Selenicën dhe bashkohet me kryqëzimin e autostradës Levan - Tepelenë, duke plotësuar kështu të gjithë financimin e nevojshëm për ndërtimin e rrugës. Në muajin shtator 2016, përfaqësues të Fondit Saudit për Zhvillim vizituan Shqipërinë dhe nënshkruan draft marrëveshjen e financimit. Pas firmosjes së marrëveshjes së këtij investimi po punohet me hartimin e dokumentave të tenderimit për punët civile si dhe ato të supervizionit.

Është shpallur tenderi për supervizionin e punimeve për këtë segment rrugor. Kontrata parashikohet të lidhet kontrata në Janar 2018. Ndërkohë punimet civile pritet të fillojnë në Qershor 2018.

Është aprovuar nga Fondi Kuvajtjan për Zhvillim Arab një grant për Asistencë teknike, me vlerë rreth 700 mijë dollarë. Granti do të përdoret për të përgatitur një masterplan për zhvillimin e bregdetit të jugut me fokusin kryesor në investimet në infrastrukturë. Në përfundim të këtij studimi do të gjenerohen projekte të gatshme në shumën rreth 30 milionë dollarë, të cilat mund të paraqiten në donatorë të mundshëm për t'u financuar. Ky grant është bërë efektiv me 12.12.2017 dhe ka një afat përdorimi deri më 31.12.2018.

7. Projekti për Zhvillimin e Integruar Urban dhe Turizmin (PZHIUT)

Prej fillimit të vitit 2016, FSHZH në bashkëpunim me Ministrinë e Zhvillimit Urban, Ministrinë e Infrastrukturës dhe Energjisë, ka zhvilluar një aktivitet intensiv konsultimi, organizimi dhe planifikimi për përgatitjen e Projektit për Zhvillim të Integruar Urban dhe Turistik, i cili financohet nga Banka Botërore në vlerën 63.8 milionë Euro (me TVSH).

Projekti u bë zyrtarisht efektiv në fund të prillit 2017 dhe ka një kohëzgjatje 5 vjeçare deri në Korrik 2022. Ai shtrihet në qendrat urbane të Sarandës, Gjirokastrës, Beratit, Përmetit dhe përgjatë korridorit turistik që kalon në këtë rajon. Nga ky projekt parashikohet të përfitojnë 84 mijë banorë dhe rreth 300 mijë turistë.

Objektivi i projektit është përmirësimi i infrastrukturës urbane, nxitja e turizmit dhe forcimi i kapaciteteve institucionale për të mbështetur turizmin dhe zhvillimin e ekonomisë lokale në zonat e përzgjedhura në jug të Shqipërisë.

Puna për zbatimin e projektit është e organizuar sipas tre komponentëve kryesorë.

Komponenti 1. Projektimi urban dhe përmirësimi i infrastrukturës (44.3 milionë Euro) i cili financon hartimin e projekteve për zbatimin e projektimit urban dhe investime për përmirësimet e infrastrukturës bashkiake në katër qendrat urbane: Saranda, Gjirokastra, Berati dhe Përmeti.

Investimet në këto bashki të përzgjedhura përfshijnë rehabilitimin e hapësirave publike (psh, parqe, sheshe, pedonale), rrjetet rrugor, nyje inter-modale dhe infrastrukturë shoqëruese (p.sh, trotualet, kryqëzimet rrugore, ndriçimet rrugore, korsitë e biçikletave, stacionet e autobusëve); restaurimin e ndërtesave të përzgjedhura të trashëgimisë dhe përmirësimin e fasadave të ndërtesave të

zgjedhura dhe përmirësimin e zonave turistike (p.sh. rrugët hyrëse, qendrat e vizitorëve, vendparkimet, sinjalistika turistike).

Ky komponent do të financojë gjithashtu përgatitjen e projekteve urbane, studimeve të fizibilitetit, projekteve inxhinierike dhe supervizimin e projekteve ndërtimore. Infrastruktura nëntokësore do të përfshihet si pjesë e përmirësimit të rrjetit rrugor, kur të jetë e nevojshme.

Komponenti 2. Përmirësimi i siteve turistike (8.4 milionë Euro), financon investime që kanë për qëllim përmirësimin e siteve turistike të përzgjidhura përgjatë korridorit turistik në Shqipërinë e Jugut.

Investimet përfshijnë restaurimin e objekteve të trashëgimisë dhe aseteve kulturore, përmirësimin e infrastrukturës mbështetëse. Ky komponent do të financojë gjithashtu përgatitjen e studimeve të fizibilitetit, planet e menaxhimit të siteve, projektet inxhinierike dhe supervizimin e projekteve ndërtimore.

Komponenti 3. Tregu i turizmit dhe zhvillimi i produkteve (7.7 milionë Euro), financon aktivitetet për ngritjen e kapaciteteve për të përmirësuar menaxhimin bashkiak dhe zhvillimin ekonomik lokal të bazuar në turizëm.

Me qëllim përshejtimin e aktiviteteve të projektit, Qeveria Shqiptare përmes Vendimit të Këshillit të Ministrave nr. 525, datë 20.7.2016 miratoi një financim prej 70 Milionë Lekë me TVSH.

Gjatë kësaj periudhe FSHZH ka punuar intensivisht me ekipin e Bankës Botërore Njësitë e Qeverisjes Vendore dhe MZHU me qëllim realizimin e objektivave të zbatimit të projektit.

Përsa i përket komponentit të parë vlen të theksohet se ka përfunduar tenderimi dhe është lidhur kontrata për :

- Rehabilitimin e shkallareve në qendrën e qytetit të Sarandës;
- Rehabilitimin e rrugës këmbësore për në Kalanë e Beratit dhe pikës panoramike jugore të Kalasë së Beratit "Tabja"

Punimet civile në terren për Rehabilitimin e shkallareve në qendrën e qytetit të Sarandës kanë filluar në 26 Dhjetor 2017. Ndërkohë që për Rehabilitimin e rrugës këmbësore për në Kalanë e Beratit, punimet parashikojnë të fillojnë në Janar 2018.

Aktualisht ka përfunduar puna për hartimin e projektit teknik dhe është në proces tenderimi:

- "Rehabilitimi i kalldrëmeve të Qafës së Pazarit Gjirokastrë". FSHZH në bashkëpunim me specialistët e Bankës Botërore është duke punuar për të përmirësuar ndërhyrjen si dhe për të siguruar reflektimin e ndjeshmërive mjedisore e sociale;

Procesi i hartimit të projektit teknik ka përfunduar edhe për "Rrugën e automjeteve për në kalanë e Beratit "Muzak Topia". Projekti ka marrë aprovimin e Bankës Botërore dhe do të vijohet me realizimin e risistemimeve dhe hapave të tjerë parapërgatitorë për fillimin e punimeve civile;

FSHZH po vijon punën për përgatitjen e termave të referencës për konsulencën mbi "Krijimin dhe zhvillimin e sistemit të muzeve në qytetin e Gjirokastrës" si dhe të projekteve teknike dhe dokumentacionit të tenderimit për një numër projektesh të tjera si:

- "Rehabilitimin e shtegut të Ali Pashës, Gjirokastrë dhe stabilizimi i skarpateve pranë Kalasë Gjirokastrë".

- Ndryshimi i qendrës historike të qytetit të Gjirokastrës;
- Përmirësimi i shëtitorës bregdetare të Sarandës, etj;
- Ndryshimi i rrugëve Përmet;
- Ndërhyrje urbane në shëtitorën “Naim Frashëri”, në Sarandë;
- Përmirësimi i infrastrukturës në lagjen muze të qytetit të Gjirokastrës;
- Përmirësimi i infrastrukturës urbane në qytetin e Beratit dhe Përmetit; etj

Në kuadër të investimeve për rehabilitimin e këtyre nënprojekteve janë zhvilluar konsultime me publikun dhe institucione të ndryshme në nivel qendror dhe lokal.

Lidhur me komponentin e dytë, është duke u punuar për kontraktimin e konsulencës që ka për qëllim përmirësimin e disa prej siteve turistike të përzgjedhura përgjatë korridorit turistik në Shqipërinë e Jugut dhe përfshin restaurimin e objekteve të trashëgimisë kulturore dhe natyrore dhe përmirësimin e infrastrukturës mbështetëse. Njëkohësisht është punuar për identifikimin e implikimeve mjedisore e sociale (përfshirë tematika të pronësisë si dhe menaxhimit) për Syrin e Kaltër, Porto Palermon, ishullin e Zvërnecit, qytetin e lashtë të Orikut si dhe Ujërat Termale të Bënjës.

Një ekspert ndërkombëtar i Shërbimit Kombëtar të Parqeve nga SHBA, vizitoi gjatë shtatorit shtet turistike përgjatë korridorit të jugut dhe po asiston FSHZH-në në përgatitjen e termave të referencës për projektimin e ndërhyrjeve.

Në komponentin e tretë, për zhvillim e tregut të turizmit dhe produkteve turistike janë përgatitur termat e referencës për konsulencën mbi “Kërkimin e tregut dhe zhvillimin e strategjisë marketing dhe produktit turistik” për jugun e Shqipërisë dhe 4 bashkitë e projektit, si dhe është hapur thirrja për aplikime. Me marrjen e ofertave nga kompani të ndryshme ka filluar puna për përzgjedhjen e konsulentit që do të ofrojë shërbimin, dhe në janar 2018 pritet të përzgjidhet kompania fituese e kësaj konsulence.

Gjithashtu janë zhvilluar një sërë takimesh me aktorët lokalë të industrisë turistike si stafet e bashkive respektive, si dhe përfaqësues nga sektori privat dhe organizatat e ndryshme që operojnë në këto Bashki me qëllim ngritjen e grupeve të punës, njohjen e tyre me projektin si dhe identifikimin fillestar të aktorëve potencial për ngritjen e DMP-ve (partneriteteve të menaxhimit të destinacionit). Ndërsa për sa i përket ngritjes së kapaciteteve për të përmirësuar menaxhimin bashkiak dhe zhvillimin ekonomik lokal të bazuar në turizëm si dhe mbështetje për sektorin e turizmit, vijon puna për vënien në funksionim të stacionit të transferimit të mbetjeve të Himarës, për të cilën po punohet për plotësimin e dokumentacionit të nevojshëm për prokurimin e pajisjeve.

8. Programi i Furnizimit me Ujë të Zonave Rurale

Furnizimi me Ujë i Zonave Rurale është një program i bashkëfinancuar nga Qeveria Shqiptare, Banka Gjermane për Zhvillim, KfW, dhe Bashkimi Europian. I ndarë në disa projekte të veçanta ky program përbën një nga iniciativat më serioze të këtyre viteve të fundit për të përmirësuar furnizimin me ujë të pijshëm të zonave rurale. Ky program ka arritur deri më sot një financim total prej 57.43 milionë Euro. Përmes këtyre financimeve përfitojnë më shumë se 135,000 banorë në zonat rurale, duke mundësuar kështu furnizim me ujë të pijshëm dhe higjienikisht të pastër.

Programi	Kohë zgjatja	Financimi Euro (milion)	Qarqet ku implementohet	Popullsia që shërbehet me ujë (banorë)	Nr. i fshatrave
FUZR I & II	2008-2016	11.66	Kukës, Dibër, Shkodër	40,000	53
SIF IV	2010-2017	5.8	Kukës, Dibër, Shkodër	20,000	26
FUZR III	2015-2019	39.97	Të gjitha Qarqet e Shqipërisë	75,000	88

8.1 "Furnizimi me Ujë i Zonave Rurale III"

Projekti "Furnizimi me Ujë i Zonave Rurale III", parashikon ndërhyrje në shkallë të gjërë në të gjithë vendin. Financues të këtij programi janë KfW me 25.5 milionë Euro dhe Bashkimi Europian përmes IPA 2013, me 9.8 milionë Euro si dhe Qeveria Shqiptare me 4 milionë Euro.

Në këtë kuadër me financim nga WBIF në shumën 670,000 Euro, gjatë periudhës Nëntor 2015 - Maj 2016, u hartuan fizibilitetet teknike dhe sociale.

Në fund të këtij procesi u administruan 252 aplikime nga 59 bashki. Bashkitë Elbasan dhe Konispol nuk kanë aplikuar në proces. Përgatitja e fizibiliteteve teknike, sociale dhe mjedisore ka përfunduar për 30 skema, nga të cilat 19 prej tyre kanë rezultuar fizibël. KfW ka dhënë miratimin për 16 skemat e para dhe pritet miratimi i 3 skemave të tjera shtesë. 16 nga skemat e miratuara janë në fazën e projektimit.

Në Qershor 2017 është lidhur kontrata me kompaninë fituese për përgatitjen e projekteve si dhe supervizionin e punimeve civile dhe ka filluar zbatimin i saj.

Periudha e parashikuar për hartimin e projekteve është 10 muaj. Në muajt e parë të kontrates, pritet të përgatiten projektet e para për zbatim për Lotin I dhe në vijim gjatë vitit 2018 do të përfundojnë projektet teknike edhe për 3 lotet e tjera.

Puna në terren për ndërtimin e ujësjellësave do të organizohet në Lot-e dhe parashikohet të fillojë me përfundimin e projektit teknik të Lotit I. Disbursimet kanë filluar pas firmosjes së kontrates së Projektimit me konsulencën.

Deri në Dhjetor 2017, janë përgatitur 2 draft projekte të LOT I, dhe pritet dorëzimi draftit projekt i edhe për një skemë tjetër. Draft projektet janë kontrolluar dhe komentuar nga FSHZH dhe do t'i dërgohen KfW-së për miratim.

Procedura e tenderimit të punimeve civile ka avancuar dhe parashikohet që Lot I, të tenderohet tremujorin e parë të 2018-ës. Është rënë dakord me KfW të aplikohet procedura "post kualifikuese".

Parashikohet që kontrata për zbatimin e punimeve civile për lotin e parë të lidhet gjashtëmujorin e parë të vitit 2018, për të vijuar më tej me lotet e tjera.

Puna në terren për ndërtimin e ujësjellësave do të organizohet në Lot-e Disbursimet kanë filluar pas firmosjes së kontrates së Projektimit me konsulencën.

Prokurimi

Gjatë muajit Mars 2014, u shpall tenderi ndërkombëtar për zbatimin e punimeve civile për 15 skemat e përzgjedhura për investim të programit SIF IV sipas procedurave përkatëse.

Në 2 Shkurt 2015, u publikua Tenderi Ndërkombëtar për studimin e fizibiliteteve teknike për RWSP III, ku morën pjesë 16 kompani. Gjatë procesit të vlerësimit, u parakualifikuan 5 kompani. Në datën 29 Qershor 2015, u paraqitën oferta teknike dhe financiare nga këto 5 kompani. Muaji Nëntor 2015 ka shënuar fillimin e zbatimit të kontratës.

Në 6 Gusht 2015 është bërë publikimi për shprehje interesi për tenderin e përzgjedhjes së konsulencës ndërkombëtare për Aktivitete Trajnuese për Stafin Trajnues të FSHZH-së gjatë programit SIF IV. Në 11 janar 2016, u bë hapja e ofertave dhe në muajin Shkurt 2016, është shpallur kompania fituese.

Gjatë muajit Prill 2016, u bë shpallja për tenderin parakualifikues të Projektim Supervizionit për Programin RWSP III. Në 23 Maj 2016, u paraqitën edhe ofertat nga 14 kompani.

Në 2 Dhjetor 2016, u hapën propozimet teknike nga kompanite e parakualifikuara, për tenderin e projektim supervizionit për fazën post-kualifikuese për programin RWSP III. Vlerësimi është bërë nga një agjent tenderues i përcaktuar nga KfW. KfW ka dhënë miratimin për vlerësimin e propozimit teknik në datë 01.02.2017. Në 22.02.2017 KfW ka dhënë miratimin për vlerësimin Financiar.

Procedurat mjedisore

Në kuadër të zbatimit të procedurave për mbrojtjen e mjedisit të programit "Furnizimi me Ujë i Zonave Rurale", janë kryer këto aktivitete:

- Janë hartuar fizibilitetet mjedisore dhe Planet e Menaxhimit të Mjedisit për të gjitha skemat e ujësjellësave.
- Janë ndjekur procedurat mjedisore dhe përgatitja e lejeve mjedisore për skemat e reja që u përfshinë me fondet e Programit SIF IV.
- Janë përgatitur fisibilitetet mjedisore për FUZR III. Krahas projekteve teknike, konsulenca do të përgatisë edhe raportet e Vlerësimit të Ndikimit në Mjedis, të cilat do të shërbejnë për pajisjen me leje mjedisore.

8.2“Furnizimi me Ujë i Zonave Rurale”, SIF IV

Në kuadër të programit SIF IV, financuar nga KfW në vlerën 5 milionë Euro dhe 0.8 milionë Euro të tjera, që janë kontribut lokal nga NJQV-të përfituese, u ndërtuan 15 skema ujësjellësash, në Qarqet, Kukës, Shkodër dhe Dibër. Pjesë e këtij projekti janë edhe linja e re transmetimit të Sopotnikës (Dibër) dhe vendosja e matësive në qytetin e Bajram Currit.

Përmes këtij projekti është siguruar furnizim me ujë higjienikisht të pastër për rreth 20,000 banorë në zonat rurale në 23 fshatra të përqëndruar në 11 Njësi Administrative.

Programi ka pasur një kohëzgjatje 6 vjeçare dhe përfundoi në Qershor 2017.

Pas përfundimit të projekteve teknike në Janar 2014, u shpall tenderi parakualifikues dhe në fund të Marsit 2014, tenderi për punimet civile në 15 skemat e përzgjedhura për financim.

Në Qershor 2014 u lidh kontrata e zbatimit të projekteve për këto 15 rrjete ujësjellësash në Qarqet Dibër, Kukës, Shkodër. Në muajin Korrik 2014, kontraktori filloi zbatimin e punimeve.

Punimet civile në 15 skema të ujësjellësive, përfunduan gjatë vitit 2015. Skemat e përfunduara janë marrë në dorëzim nga NJQV-të e reja. Kontributi lokal është mbledhur në masën 100 përqind.


Referuar Marrëveshjes së Investimit dhe komponentëve të saj të ndërhyrjes për masa sanitare emergjente, është ndërhyrë në 9 skema ku ishte investuar për ndërtimin e ujësjellësive. Zbatimi i përmirësimit të infrastrukturës sanitare në skemat e përzgjedhura ka përfunduar gjatë vitit 2016.

Gjithashtu u investua për pajisjen me matësia uji në qytetin e Bajram Currit, në mënyrë që të menaxhohet konsumi i ujit për skemat që varen nga linja e transmetimit që furnizon këtë qytet. Punimet për vendosjen e matësive kanë përfunduar në Dhjetor 2016 dhe periudha e garancisë është mbyllur në Dhjetor 2017.

Ngritja e kapaciteteve në kuadrin e programit të Investimeve Sociale IV

Në përshtatje me nevojat që ka FSHZH lidhur me ngritjen e kapaciteteve njerëzore për trajnimin e Njërive të Qeverisjes Vendore dhe stafit teknik të ndërmarrjeve të ujësjellësive, është zhvilluar një trajnim multidisiplinar.

Aktivitetet e trajnimit konsistuan në trajnimin e rreth 15 trajnerëve të cilët janë staf i FSHZH-së, me qëllim aftësimin e tyre për të trajnuar operatorët e Njërive të Qeverisjes Vendore dhe stafin administrues dhe teknik të ndërmarrjeve të



ujësjellësive, në mënyrë që të sigurohet një funksionim dhe mirëmbajtje e qëndrueshme e investimeve të programit SIF IV.

Kontrata me konsulencën ndërkombëtare është lidhur në Mars 2016 dhe në Prill 2016, ka filluar mobilizimi i kompanise konsulente. Konsulenca zgjati 15 muaj dhe ka përfunduar në Qershor 2017.

Konkluzione:

Menaxhimi profesional dhe zbatimi i suksesshëm i programeve FUZR I, II, dhe SIF IV, ka rezultuar me përfitimin e financimeve të tjera, të cilat po përdoren për zbatimin e projektit FUZR III.

Në këtë kuadër, u sigurua një financim nga WBIF në shumën 750,000 Euro, të cilat u përdoren për hartimin e fizibiliteteve teknike dhe sociale në kuadër të projektit Furnizimi me Ujë i Zonave Rurale III, i cili ka shtrirje në të gjithë vendin. Financues të këtij programi janë KfW me 25.5 milionë Euro dhe Bashkimi Europian përmes IPA 2013, me 9.8 milionë Euro si dhe Qeveria Shqiptare me 4 milionë Euro.

FSHZH ka aplikuar për një tjetër projekt investimi i cili do të fokusohet në Bashkinë Himarë dhe do të mbulojë fshatrat Kuç, Buronjë, Pilur, Kudhës, Vuno, Jalë, Livadhi, Himarë Fshat dhe Qeparo.

Projekti FUZR IV, do të përfshijë investime në ujësjellës kanalizime, dhe ndërtimin e impiantit të trajtimit të ujërave të ndotura të Himarës. Ky projekt është paravlerësuar me një buxhet prej 40 Milionë Euro kredi, që do të financohet nga KfW për ndërtimin dhe 2 milionë Euro grant për masa shoqëruese.

Aktualisht është duke u përgatitur marrëveshja për financimin e përgatitjes së fizibilitetit teknik, i cili do të financohet nga granti 750,000 Euro i KfW. Në këtë projekt, është propozuar bashkëfinancimi nga WBIF me një fond prej 4 milionë Euro për komponentët e projektimit, tenderimit dhe supervizionit. Kohëzgjatja e këtij programi do të jetë 5 vjeçare, nga viti 2018 deri në vitin 2022.

9. Programet e financuara nga IPA, Bashkimi Evropian

9.1 Vija bregdetare e qytetit të Vlorës - Lungomare

Delegacioni European hapi procedurat e tenderimit në 23 Mars 2015 dhe punimet civile filluan në 12 Qershor 2015. Projekti u nda në disa faza dhe është bashkërenduar me financime të tjera të Qeverisë Shqiptare, përmes Fondit për Zhvillimin e Rajoneve.

Projekti me vlerë rreth 15 milionë Euro është bashkefinancuar nga IPA 2013, në vlerën 12 milionë Euro (11.3 milionë Euro punime civile & 0.7 milionë Euro supervizim) dhe nga Qeveria Shqiptare në vlerën rreth 5.2 milionë Euro. Punimet kanë përfunduar në Qershor 2017.

Ridimensionimi i kësaj pjese të bregdetit sipas koncepteve moderne dhe bashkëkohore, krijoi një model të ri të zhvillimit të turizmit jo vetëm për Vlorën por për gjithë bregdetin shqiptar. Ky projekt ambicioz është kombinuar me një sërë ndërhyrjesh plotësuese si rikonstruksioni i rrugës, ndërtimi i shëtitores, sheshet publike, ndërtimi i plazhit të ri, mbrojtja detare, gjelbërimi dhe elementë të tjerë të arredimit urban. Ky projekt është alternuar edhe me investime të tjera të rëndësishme, të zbatuara nga Fondi Shqiptar i Zhvillimit si rruga Transballkanike, rruga Dhimitër Konomi, Unaza e qytetit, Rruga e Pyllit të Sodes etj, të cilët me përfundimin e tyre do t'i japin Vlorës një dimension të ri evropian.

9.2 IPA 2012 – Përmirësimi i aksesit në shërbimet publike për grupet vulnerable në zonat periferike në qytetet Tiranë dhe Durrës

Objektivi specifik i këtij projekti është përmirësimi i infrastrukturës sociale për grupet vulnerable në qytetet e Tiranës dhe Durrësit.

Shuma e financimit është 8 milionë Euro nga të cilat 6.2 financim i IPA kurse 1.8 milionë Euro është financim i dy bashkive të Tiranës dhe Durrësit.

Në vijim të aktivitetit të zhvilluar gjatë vitit 2014, projektet e financuara në Bashkitë Tiranë dhe Durrës, kanë filluar zbatimin në Janar 2015.

Projekti përfshin:

- Ndërtimin e infrastrukturës mësimore e sociale për komunitetet lokale në Tiranë e Durrës, dhe;
- Punimet për rehabilitimin e infrastrukturës urbane në bashkitë Tiranë e Durrës;

Punimet kanë zgjatur 18 muaj. Objektet kanë përfunduar dhe dorëzimi përfundimtar i tyre është kryer në maj 2017. Procedurat për monitorimin dhe supervizimin e punimeve civile janë ndjekur nga Delegacioni European. Në këtë projekt FSHZH paguan vetëm TVSH-në.

9.3 Programet e CBC/IPA, financuar nga BE

FSHZH gjatë vitit 2017 është përzgjedhur si partner në 6 projekte të financuara nga Programet CBC/Bashkëpunimit Ndërkufitar. Këto projekte nga të cilat 5 financohen nga Programi Adrion dhe 1 nga Programi Shqipëri Kosovë kanë fokus zhvillimin turistik dhe inovacionin në mjedis. Projektet në total kanë një vlerë prej 1 Milion Euro dhe pritet të fillojnë zbatimin në fillim të vitit 2018. Departamenti i Zhvillimit Rajonal gjatë vitit 2017 ka ndjekur ngushtësisht me partnerët në këto projekte fazat e aplikimit.

10. Përgatitja dhe aplikimi për projekte të reja

Një nga aktivitetet e rëndësishme e zhvilluar paralelisht me punën për zbatimin e projekteve të investimeve është dhe vlerësimi i nevojave dhe përgatitja e projekteve të reja, aplikimi pranë donatorëve dhe sigurimi i fondeve për financim.

Duke filluar nga muaji Prill 2017, FSHZH ka nisur procesin e programimit të 3 projekteve:

Projekti i Rrugëve Lidhëse Rajonale, parashikon ndërhyrje në rrjetin rrugor rajonal në zona me potencial bujqësor dhe turistik në të gjithë vendin. Ai do të financohet nga Banka Botërore me vlerë të pritshme financimi 50 milionë USD. Projekti parashikohet të bëhet efektiv në 2018 dhe të ketë kohëzgjatje 5 vjeçare.

FSHZH u ka kërkuar zyrtarisht të gjitha bashkive në vend sjelljen e një liste me 2-3 projekte prioritare për secilën bashki. Gjatë gjashtëmujorit të parë 2017, janë mbledhur të dhënat e nevojshme për kryerjen e analizës kosto përfitim (të dhëna për trafikun, gjendjen e rrugës, hartat, të dhëna për nivelin social-ekonomik të komuniteteve të lidhura nga rruga).

Gjatë Misionit të BB në Korrik 2017, u dakortësua që procesi të kalojë në dy faza:

Në fazën e parë, u finalizua një listë financimi për vitin e parë të programit, për rreth 60 km rrugë që kanë një ndikim të rëndësishëm në turizëm, për të cilat me dakordësinë e Bankës dhe fondet e buxhetit të shtetit u krye me sukses procesi i prokurimit dhe kontraktimit të projektimit. Nga ana e kontraktorëve janë dorëzuar projektimet paraprake dhe po vijon puna me përgatitjen e versioneve finale të tyre për rrugët e mëposhtme:

- Fier - Seman, 18.4 km, një segment kryesor turistik i bashkisë Fier që lidh me bregdetin por edhe një numër të rëndësishëm komunitetesh gjatë saj.
- Qafë Thore - Theth 17.5 km. Segmenti i propozuar përfundon lidhjen e fshatit dhe parkut kombëtar të Thethit, një rrugë shumë e dëmtuar dhe e rrezikshme në një zonë gjithnjë e më të frekuentuar në veçanti nga turistët e huaj.
- Shëngjin - Rana e hedhun - Baks Rrjoll 15 km. Kjo rrugë lidh plazhet e Shëngjinit e të Velipojës duke krijuar hapësira të reja për investime. Ajo lidh dy plazhet më të frekuentuara të veriut dhe krijon një akses më të kollajtë nga Tirana dhe Aeroporti për të dy zonat.
- Pogradec - Tushemisht 8.5 km. Rruga e propozuar është rruga kryesore që lidh Pogradecin me Tushemishtin dhe me pikën kufitare të Maqedonisë. Investimi në këtë rrugë që është në linjën e brendshme të liqenit krijon mundësinë e rikonceptimit si hapësirë e madhe publike të vijës së bregut të liqenit nga Pogradeci në Drilon.

Faza e dytë do të vazhdojë me analizën e projekteve të sjella nga bashkitë dhe përgatitjen e një liste investimesh për pjesën e mbetur të 3-4 viteve të kohëzgjatjes së projektit. Potencialisht kjo listë do t'u shërbejë edhe donatorëve të tjerë apo qeverisë për identifikimin dhe financimin e rrugëve më të rëndësishme dytësore në vend.

Projekti për Zhvillimin e Integruar të Zonave me Potencial Turistik, parashikon investime të projekteve strategjike rajonale në zonat e Shkodrës, Korçës, Divjakë-Fier, Durrës - Kavajë, Pogradec e Përmet. Projekti do të financohet nga BERZH dhe IPA me vlerë të pritshme financimi 100 milionë Euro dhe parashikohet të ketë kohëzgjatje 4 vjeçare.

FSHZH po analizon territoret e përfshira në program për të identifikuar projekte strategjike potenciale për t'u financuar.

Në kuadër të këtij projekti, FSHZH aplikoi dhe fitoi një grant të WBIF me BERZH që do të mundësojë vazhdimin e studimit të Bregut perëndimor të Liqenit të Shkodrës, pra vazhdimin e projektit të rivitalizimit të Shirokës, për ta vijuar këtë nismë deri në kufi, përfshirë dhe Zogaj, me synim hapjen e kufirit në këtë zonë dhe bashkëpunimit me Malin e Zi. Vlera e grantit është 400 mijë Euro dhe do të implementohet gjatë periudhës 2018 -2019.

Projekti Furnizimi me Ujë i Zonave Rurale IV, parashikon ndërhyrje të plota në të gjithë sistemin e furnizimit me ujë dhe atë të ujërave të zeza, ndërtimin e një impianti për trajtimin e ujërave të zeza në Bashkinë Himarë dhe qytetin e Orikumit. Ai do të financohet nga KfW, WBIF, Qeveria Shqiptare, me vlerë të pritshme financimi 53 milionë Euro. Projekti parashikohet të bëhet efektiv në 2018 dhe të ketë kohëzgjatje 5 vjeçare. Aktualisht po përgatiten Termat e Referencës për studimin e fizibilitetit, i cili do pasojë me hartimin e projekteve teknike dhe zbatimin e punimeve,

11. AKTIVITETI INSTITUCIONAL

11.1 Menaxhimi Financiar

Analiza financiare për vitin 2017, bazuar në sistemin raportues të pasqyrës së të ardhurave dhe shpenzimeve, jep informacion kryesisht mbi funksionet kryesore financiare: planifikimin, kontabilitetin, menaxhimin financiar të investimeve dhe atë operativ-administrativ.

Gjatë vitit 2017, janë bërë përpjekje për ruajtjen dhe garantimin e ekuilibrave financiarë të institucionit në mënyrë që i gjithë aktiviteti ekonomik-financiar të jetë i organizuar brenda limiteve të lejuara të financimit. Gjithashtu vëmendje i është kushtuar administrimit dhe menaxhimit të fondeve me përgjegjshmëri dhe transparencë, si dhe monitorimit dhe mbikqyrjes së detajuar të fondeve sipas komponentëve përkatës: investime në infrastrukturë, administrim i brendshëm, asistencë teknike, etj.

Me Aktin normativ Nr.2 datë 16.08.2017 dhe Nr.3, datë 06.11.2017, Buxheti faktik i FSHZH është në vlerën 111.6 milionë Euro. Me këto Akte, përveç shtesave dhe pakësimeve të financimit të huaj dhe të brendshëm, është transferuar edhe Buxheti i MZHU-së “Për Programin e Infrastrukturës Vendore dhe Rajonale” të financuar nga Fondi për Zhvillimin e Rajoneve, në vlerën rreth 41 milionë Euro.

Sa më sipër buxheti faktik për vitin 2017 për institucionin është rreth 111.6 milionë Euro. Gjatë vitit 2017, buxheti është realizuar në masën 97 % ose rreth 108.5 milionë Euro. Më poshtë tabela e realizimit për çdo kategori disbursimi.



Realizimi i Buxhetit për vitin 2017

Kategoria	Totali i Përgjithshëm		
	Buxheti vjetor (Euro)	Realizimi 2017 (Euro)	%
Punime Civile	104,976,118	102,473,545	98%
Design&superv.	2,172,184	2,095,461	96%
Asistence Teknike	2,185,036	2,081,082	95%
Training	114,982	21,634	19%
Investime &PaisjeFZSH	248,565	193,451	78%
Kosto Operative	1,883,587	1,635,228	87%
Rezerve	42,827	-	0%
T o t a l i	111,623,298	108,500,401	97%

Investimet gjatë kësaj periudhe janë realizuar në masën 102.4 milionë Euro ose rreth 98% e buxhetit faktik.

Në këte zë janë përfshirë rreth 41 milionë Euro investime në kuadër të FZHR-së, të cilat janë kryer nga NjQV-të në kuadër të Programit Infrastruktura Vendore dhe Rajonale.

Pasqyrat financiare që paraqiten më poshtë, përmbajnë të dhëna të cilat krijojnë një skenar të qartë të mjedisit ekonomik-financiar dhe të performancës së aktivitetit të FSHZH-së, si dhe një analizë në nivelin strukturor të shpenzimeve dhe të të ardhurave duke paraqitur në këtë mënyrë raportin si dhe peshën specifike të donatorëve, kategorive dhe komponentëve të veçantë gjatë këtij viti.



Gjatë vitit 2017 janë përgatitur Pasqyrat Financiare Vjetore (Balanci) për vitin 2016 dhe në 28.02.2017 janë dërguar në Ministrinë e Financës sipas formatit dhe standarteve të kërkuara.

Lidhur me auditin e jashtëm për vitin 2016, kompania audituese Grant Thornton e cila ka kryer auditimin për aktivitetin financiar të FSHZH-së sipas programeve respektive dhe ka dorëzuar në muajin Dhjetor 2017 raportet përkatëse. Gjithashtu gjatë këtij viti, nga kompania Deloitte & Touche është kryer auditimi i jashtëm për donatorin WBIF/Grant për programin “Zhvillimi i Alpeve Shqiptare dhe Zonave Bregdetare, për donatorët BEI Grant, KFW SIF IV dhe IPA 2009, për programin e “Rrugëve Dytësore dhe Lokale”.

Në kuadër të PBA 2018-2020, pas diskutimit me departamentet dhe njësitë përkatëse të FSHZH-së janë plotësuar formatet në përputhje me Udhëzimin e Ministrisë së Financave për kërkesat buxhetore të institucionit për periudhën 2018-2020 dhe janë dorëzuar në Ministrinë e Financave brenda afateve të përcaktuara (faza e parë më 30.04.2017 dhe faza e dytë më 31.08.2017).

Gjatë vitit 2017, FSHZH ka raportuar periodikisht pranë Ministrisë së Financave, Ministrisë së Integrimit dhe institucioneve të tjera sipas kërkesave lidhur me:

- Monitorimin e investimeve publike etj;
- Disbursimet dhe shpenzimet sipas programeve dhe donatorëve respektivë;

Gjithashtu janë dërguar raporte periodike tek Banka Botërore, KfW dhe CEB në përputhje me formatet sipas marrëveshjeve respektive.

Gjatë vitit 2017, FSHZH ka menaxhuar fondet e akorduara nga donatorët e huaj dhe Qeveria Shqiptare, që rrjedhin nga marrëveshjet qeveritare në kuadër të programeve në zbatim, fonde për investime të financuara 100% nga Qeveria Shqiptare dhe fonde të Infrastruktura vendore dhe Rajonale të financuara nga Fondi i Zhvillimit të Rajoneve.

Aktualisht FSHZH ka në ndjekje financiare këto programe:

- Programi “Rrugët Dytësore dhe Lokale”, financuar EIB Grant, IPA 2010, 2011, KfW & IPA 2009 dhe Qeveria Shqiptare;
- Programi “Furnizimi me Ujë i Zonave Rurale I+II+SIF IV”, financuar nga KfW, Qeveria Shqiptare dhe përfituesit e drejtpërdrejtë;
- Programi “Furnizimi me Ujë i Zonave Rurale III”, financuar nga KfW, IPA 2013, WBIF, Qeveria Shqiptare dhe përfituesit e drejtpërdrejtë;
- Programi “Zhvillimi i Alpeve Shqiptare dhe Zonave Bregdetare”, financuar nga CEB, WBIF dhe Qeveria Shqiptare;
- Programi “Rehabilitimi i Rrugës së Lumit të Vlorës”, financuar nga Fondi Kuvajtian, Fondi Saudit dhe Qeveria Shqiptare;
- Programi “Për Zhvillimin e Integruar Urban dhe Turizmin” financuar nga Banka Botërore;
- Programi Vija Bregdetare e qytetit të Vlorës-Lungomare, financuar nga IPA 2013 dhe Qeveria Shqiptare;
- Përmirësimi i SHPSI për grupet vulnerable dhe zonat periferike të Bashkive Tiranë, Durrës, financuar nga IPA 2012;
- Programi Infrastruktura Vendore dhe Rajonale në kuadër të Fondit të Zhvillimit të Rajoneve;
- Programi për Rehabilitimin e Segmenteve Rrugore Prioritare financuar 100% nga Qeveria Shqiptare.

Disbursimi i Fondeve gjatë vitit 2017, sipas programeve

Gjatë vitit 2017, FSHZH ka menaxhuar fondet e akorduara nga donatorët e huaj, Qeveria Shqiptare dhe nga Fondi i Zhvillimit të Rajoneve. Për periudhën Janar - Dhjetor 2017, në përputhje me kërkesat për financime, janë disbursuar nga donatorët e huaj rreth 16.75 milionë Euro sipas programeve më poshtë:

- Për Programin “Rrugët Dytësore dhe Lokale” janë disbursuar rreth 4.46 milionë Euro nga të cilat: KfW SIF IV & IPA 2009 rreth 1.97 milion Euro, IPA 2010-2011 rreth 2.11 milionë Euro, BEI Grant 381 mijë Euro;
- Për Programin “Furnizimi me Ujë i Zonave Rurale III” si dhe Programin “Furnizimi me Ujë i Zonave Rurale Faza I & II/SIF IV” janë disbursuar rreth 1.26 milion Euro nga të cilat: KfW 331 mijë Euro, WBIF 461 mijë Euro, KfW Grant 282 mijë Euro dhe IPA 2013 rreth 182 mijë Euro;

- Për Programin “Zhvillimi i Alpeve Shqiptare dhe Zonave Bregdetare” janë disbursuar rreth 9.44 milion Euro, nga të cilat: CEB kredi rreth 8.60 milionë Euro dhe WBIF 839 mijë Euro;
- Për Programin “Zhvillimi i Integruar Urban dhe Turizmin” janë disbursuar nga Banka Botërore 1.5 milionë Euro;
- Për programet IPA Adriatika dhe IPA Hera janë disbursuar 96 mijë Euro.

Fondet e akorduara nga Qeveria Shqiptare:

Për programet me financim të huaj si bashkëfinancim per Kosto lokale dhe TVSH janë disbursuar rreth 8.25 mln Euro;

Për Programin Rehabilitimi i Segmenteve Rrugore Prioritare 100% nga Qeveria Shqiptare janë disbursuar rreth 29.8 mln Euro

Për Programin e Infrastrukturës Vendore dhe Rajonale të financuar nga Fondi për Zhvillimin e Rajoneve janë disbursuar rreth 52.6 mln Euro përfshirë edhe Buxhetin e MZHU transferuar tek FSHZH me Aktin normativ 3 date 06.11.2017. MZHU i ka shpërndarë fondet e FZHR-së në fillim të vitit 2017, në institucionet qendrore dhe vendore sipas projekteve përkatëse.

Të ardhura të tjera

Gjatë aktivitetit ekonomik-financiar të saj, FSHZH realizon të ardhura në vlera monetare nga aktivitetet dytësore dhe nga marrëveshjet e drejtpërdrejta me donatorë të ndryshëm.

Gjatë vitit 2017, janë arkëtuar të ardhura nga aktiviteti dytësor dhe nga donatorët e huaj si më poshtë:

- Të ardhura nga shitja e dokumentave të tenderimeve 15 mijë Euro;
- Të ardhura nga interesa bankare 6 mijë Euro;
- Kontribute nga Bashkitë si bashkëfinancuese për projekte të financuara në kuadër të Programit të Infrastrukturës Vendore - Fondit të Zhvillimit të Rajoneve rreth 187 mijë Euro;
- Të ardhura nga konfiskimi i garancive në vlerën 334 mijë Euro;
- Kontribute nga Bashkitë si bashkëfinancuese për Programin “Furnizimi me Ujë i Zonave Rurale III”- rreth 870 mijë Euro.

Shpenzimet dhe Realizimi i Zërave të Buxhetit për vitin 2017


Gjatë vitin 2017, FSHZH ka menaxhuar një fond prej rreth 111.5 milionë Euro, me një realizim financiar në masën 97% kundrejt buxhetit faktik. Realizimi financiar paraqitet më poshtë i ndarë sipas komponentëve:

Infrastruktura

Ky zë përbën aktivitetin kryesor të Institucionit dhe përfaqëson investimet në infrastrukturë për punime civile për rikonstruksion dhe përmirësim të infrastrukturës rrugore, gjelbërim të infrastrukturës rrugore dhe objekteve të tjera, rehabilitim të zonave urbane, rehabilitim dhe ndërtim të ujësjellësave ruralë dhe shkollave, restaurimin e objekteve të trashëgimisë kulturore dhe të tjera. Investimet gjatë këtij viti janë realizuar në masën 102.5 milionë Euro ose rreth 98 përqind e buxhetit faktik. Gjatë këtij viti kanë qenë në proces financimi rreth 118 kontrata punimesh.

Realizimi financiar për periudhën Janar - Dhjetor 2017 për kategorinë “Investime”

Programet	Pesha specifike në % kundrejt realizimit	Realizimi në vlerë (shprehur në Euro)
Programi i Rrugeve Dytësore dhe Lokale (IPA 2010-2011,,KfW IPA 2009)	3.9%	3,990,899
Lungomare+PSHPSI	2.8%	2,857,040
PZHIUT BB	0.1%	88,059
Punet ne Komunitet IV(CEB)	7.2%	7,353,414
Programi i Ujesjellsave Rurale (KfW/SIFIV)	0.1%	61,108
Investime Qeveria Shqiptare+TVSH+FZHR	85.8%	87,875,680
Perfituesit+Fondet e FSHZH-se	0.2%	247,345
Totali	100 %	102,473,545



Projektim - Supervizimi

Gjatë vitit 2017 ky zë është realizuar në vlerën rreth 2.09 milion Euro ose 96 përqind kundrejt buxhetit faktik dhe përfshin shpenzime për projektim dhe supervizion të punimeve civile sipas programeve përkatëse. Në kuadër të Fondit të Zhvillimit të Rajoneve në këtë kategori janë disbursuar rreth 945 mijë Euro për financimin e programeve për “Hartimin e projekt-ideve dhe projekteve të zbatimit për transformim dhe përmirësim të hapësirës urbane në disa zona të vendit”. Në kuadër të Projektit të Rrugëve Dytësore dhe Lokale janë financuar nga IPA 2009 rreth 92 mijë Euro. Në kuadër të Programit “Furnizimi me Ujë i Zonave Rurale III” janë financuar 452 mijë Euro. Në kuadër të Programit “Zhvillimi i Alpeve Shqiptare dhe Zonave Bregdetare” janë financuar nga CEB rreth 217 mijë Euro, si dhe rreth 386 mijë Euro të financuara nga Qeveria shqiptare në kuadër të projekteve të investimeve dhe bashkefinancimit.

Asistenca Teknike

Ky komponent është realizuar në vlerën 2.08 milion Euro ose në masën 95 përqind kundrejt buxhetit faktik. Ky zë përfshin asistencë teknike të huaj për menaxhimin e kontratave të punimeve, ndjekjes së procedurave të prokurimeve sipas standarteve të çdo donatori dhe mirëmbajtjes rrugore dhe ujësjellësive. Në këtë komponent janë financuar rreth 743 mijë Euro në kuadër të Programit “Furnizimi me Ujë i Zonave Rurale III” për studime fizibiliteti, përgatitje projektesh për ujësjellësia rurale, ngritje kapacitetesh dhe trajnim të stafit financiar nga KfW. Në kuadër të Programit “Zhvillimi i Alpeve Shqiptare dhe Zonave Bregdetare për “Përgatitjen e masterplanit dhe studime Fizibiliteti” financuar nga WBIF-Grant, rreth 1 milion Euro si dhe 47 mijë Euro nga Qeveria Shqiptare (rimbursim i taksava lokale). Në kuadër të Programit të “Rrugëve Dytësore dhe Lokale”, janë financuar nga BEI Grant rreth 258 mijë Euro për ndërtimin dhe zhvillimin Sistemit të Teknologjisë së Informacionit dhe Komunikimit të Fondit Shqiptar të Zhvillimit. Në kuadër të Programit “Për Zhvillimin e Integruar Urban dhe Turizmin” janë financuar rreth 29 mijë Euro nga Banka Botërore për pagat e stafit të Njësisë së Koordinimit të Projektit pranë Ministrisë së Infrastrukturës dhe Energjisë.

Kualifikime


Ky komponent përfshin shpenzimet e bëra për kualifikimin e stafit të FSHZH-së dhe bashkive, pjesëmarrjen në panairin e turizmit në Vjenë dhe Shtutgard me temë “Ndërtimi i produktit turistik bazuar në eksperiencën e vendeve anëtare të BE”, aktivitet ky i realizuar në kuadër të programit “Zhvillimi i Alpeve Shqiptare dhe Zonave Bregdetare”, pjesëmarrje në trajnimin e organizuar nga Banka Botërore në Ankara mbi menaxhimin e kontratës dhe projektit në kuadër të projektit për Zhvillimin e Integruar Urban dhe Turizmin si dhe analiza periodike të institucionit. Ky zë është realizuar në vlerën rreth 21 mijë Euro ose në masën 19% kundrejt buxhetit faktik.

Investime dhe pajisje

Ky komponent përfshin shpenzimet në vlerën 193 mijë Euro ose 78 përqind të buxhetit faktik. Ky shpenzim pasqyron blerjen e një automjeti, kompjutera dhe fotokopje për zyrat e FSHZH-së në kuadër të Programit “Zhvillimi i Alpeve Shqiptare dhe Zonave Bregdetare” si dhe blerjen e tre automjeteve në kuadër të programit Zhvillimin i Integruar Urban dhe Turizmin.

Shpenzime operative

Shpenzimet operative gjatë vitit 2017, janë realizuar në vlerën 218 milionë Lekë ose rreth 86 përqind kundrejt buxhetit vjetor.



Realizimi i zërave të shpenzimeve të kësaj kategorie kundrejt buxhetit vjetor është paraqitur në tabelën e mëposhtme:

Realizimi i koston operative kundrejt buxhetit vjetor 2017
Analiza e shpenzimeve të koston operative

REALIZIMI KUNDREJT BUXHETIT 2017 (Kosto operacionale) Lekë				
Nr.	Zërat	Buxhet 2017	Realizimi 2017	Përqindja e Realizimit
1	Kanceleri	3,000,000	357,306	12%
2	Karburant	10,500,000	9,706,350	92%
3	Servis makinash/siguracion	6,000,000	4,563,054	76%
4	Pagat	203,135,000	181,444,996	89%
5	Dieta	3,200,000	2,918,384	91%
6	Telefon dhe PT	3,000,000	1,921,482	64%
7	Internet	1,000,000	929,750	93%
8	Energji Elektrike/Ujë	2,500,000	1,836,516	73%
9	Zyra me qera	3,000,000	2,443,790	81%
10	Mirembajtje/Sigurim godine	4,400,000	3,808,322	87%
11	Te tjera/Petty cash	5,648,000	2,805,678	50%
12	Publikimi & Promovime	4,000,000	2,610,835	65%
13	Kontrata Sherbimi	3,100,000	2,750,377	89%
14	Shp. gjyqesore/perkthime	2,000,000	557,260.00	28%
15	Servis kompjuter dhe fotokopje	700,000	356,226	51%
	TOTAL	255,183,000	219,010,326	86%

a. Shpenzimet për kancelari

Shpenzimet kryesore në këtë zë janë kryesisht për kancelari të ndryshme, letër, bojra për fotokopje dhe printera, etj. Gjatë këtij viti janë shpenzuar rreth 35 mijë lekë ose 12 % e buxhetit faktik për blerje materiale zyre dhe kancelarie. Realizimi financiar në këtë nivel vjen për shkak se faturat do të paguhen në vitin 2018, pasi akoma nuk janë paraqitur nga furnitori.

b. Shpenzimet për karburant

Buxheti vjetor për këtë zë të shpenzimeve është 10.5 milionë Lekë. Gjatë këtij viti ky zë është realizuar në vlerën 9.70 milionë Lekë ose 92 % kundrejt buxhetit faktik. Ky zë ka lidhje dhe mbështet kryesisht aktivitetin e kryer nga Departamenti i Infrastrukturës për mbikqyrjen e objekteve në terren.

c. Shpenzimet për mirëmbajtje dhe siguracion të automjeteve

Këto shpenzime përfshijnë shërbimet periodike, shërbimet e veçanta, blerjen e pjesëve të këmbimit, gomave dhe siguracionin e mjeteve. Buxheti i parashikuar për këtë zë është rreth 6 milionë lekë. Realizimi për këtë vit është rreth 4.56 milionë lekë ose në masën 76 % të buxhetit faktik.

d. Shpenzimet për paga, sigurimet shoqërore dhe shëndetësore

Shpenzimet për pagat dhe sigurimet shoqërore për vitin 2017 janë parashikuar në shumën 203 milionë lekë. Ky zë është realizuar në masën 89% kundrejt buxhetit faktik. Në këtë zë është përfshirë edhe sigurimi i jetes, shëndetit dhe pensionit suplementar me kontribut të përbashkët të institucionit dhe stafit.

e. Shpenzimet për dieta e shërbime

Shpenzimet për dieta dhe shërbime për vitin 2017 janë parashikuar në shumën 3.2 milionë lekë. Ky zë shpenzimesh është realizuar në vlerën 2.92 milion lekë ose 91% kundrejt buxhetit faktik dhe mbështet kryesisht aktivitetin e kryer nga Departamenti i Infrastrukturës për mbikqyrjen e objekteve në terren.

f. Shpenzimet e komunikimit

Në këtë zë përfshihen shpenzimet për komunikim si dhe shpenzimet e shërbimit postar. Ky zë është parashikuar 3 milionë lekë dhe është realizuar në vlerën 1.92 milion lekë ose 64% kundrejt buxhetit faktik.

g. Shpenzime të tjera

Në zërin shpenzime të tjera përfshihen shërbim interneti, facilitete dhe qera rajonale të FSHZH-së, energji elektrike, ujë, ruajtje e godinës, mirëmbajtje e sistemeve të zyrave qendrore, siguracione, seminare të stafit, blerje të vogla etj. Për këtë zë në Buxhetin 2017 janë parashikuar rreth 16.54 milionë lekë. Ky zë është realizuar në vlerën 11.82 milionë lekë ose 71% kundrejt buxhetit faktik.

h. Publikime & Promovime

Në këtë zë përfshihen shpenzimet për analizat periodike të stafit, dizajne, printime, publikime dhe njoftime të ndryshme në shtyp (njoftime për tendera, punësime, etj). Në buxhetin e vitit 2017 për këtë zë janë parashikuar rreth 4 milionë Lekë. Gjatë këtij viti janë realizuar shpenzime në masën 2.61 milion lekë ose rreth 65% kundrejt buxhetit faktik të parashikuar për këtë zë për njoftime, publikime, përgatitje video dhe dokumentarë.

i. Kontrata shërbimi dhe shpenzime gjyqësore, përkthime, noterizime

Në këtë zë përfshihen shpenzime gjyqësore dhe asistencë juridike si dhe pagesa për kontrata shërbimi. Për këtë zë në buxhetin 2017 janë parashikuar rreth 5.1 milionë

lekë. Gjatë këtij viti shpenzimet për këtë zë janë në vlerën 3.31 milion lekë ose 65% kundrejt buxhetit faktik.

j. Servis kompjuter dhe fotokopje

Në buxhetin e vitit 2017 për këtë zë janë parashikuar rreth 700 mijë lekë për mirëmbajtjen e pajisjeve kompjuterike dhe fotokopjeve. Shpenzimet për këtë zë janë realizuar në vlerën 356 mijë lekë ose rreth 51% kundrejt buxhetit faktik.

11.2 Komunikimi dhe Marrëdhëniet me Publikun

Kompleksiteti i projekteve të zbatuara nga Fondi Shqiptar i Zhvillimit dhe intensiteti i investimeve gjatë vitit 2017 së pari ka rritur kërkesën për informacion nga partnerët financues, media dhe qytetarët. Kjo kërkesë në rritje ka nxjerrë në pah nevojën për të intensifikuar komunikimin e brendshëm me qëllim ofrimin në çdo kohë të një informacioni të cilësor dhe koherent. Që prej vitit 2012 Fondi Shqiptar i Zhvillimit ka një strategji komunikimi që kryesisht ka synuar rritjen e vizibilitetit të institucionit përballë një publiku të gjerë, duke përdorur median si kanal kryesor komunikimi. Kjo strategji ka sjellë rezultate mjaft pozitive. Duke pasur parasysh që kjo strategji është miratuar në vitin 2012 dhe nisur nga numri në rritje i investimeve, lindi nevoja për një përditësim të kësaj strategjie. Draft strategjia e re e komunikimit është përfunduar dhe janë vendosur objektivat e rinj që synojnë t'i përgjigjen rrethanave dhe sfidave të reja. Synohet që komunikimi të kthehet në një instrument jo vetëm për rritjen e vizibilitetit të FSHZH-së, por edhe të qarkullimit në kohë të informacionit brenda për brenda institucionit për një komunikim konsistent dhe cilësor me grupet e jashtme.

11.2.1 Forcimi i imazhit

Brandimi

Gjatë muajve të fundit të 2017-ës është punuar për të patur një prezantim sa më konsistent të institucionit dhe forcimin e identitetit. Për këtë janë ndërmarë hapat e mëposhtëm:

- Përditësimi i Brandbook-ut të FSHZH-së (formatet e logos, rregullat e përdorimit, etj.)
- Zhvillimi i modeleve për materialet që më së shumti përdoren në komunikimin me audiencat e jashtme.
- Përgatitja e materialeve promociionale me logon e FSHZH-së.

11.2.2 Marrëdhëniet me publikun

Komunikimi me publikun është kryer nëpërmjet dy kanaleve kryesorë: media tradicionale dhe platformat sociale.

Media

Puna e FSHZH-së është në vëmendjen e vazhdueshme të mediave për shkak të dukshmërisë dhe impaktit që projektet kanë. Janë përpunuar kërkesa nga gazetarë të mediave të ndryshme për FSHZH-në në tërësi, por edhe për projekte specifike. Janë identifikuar rreth 70 raportime të mediave për projektet e FSHZH-së vetëm gjatë 3-mujorit të fundit të vitit 2017.

Ndërkohë janë administruar katër kërkesa për informacion lidhur me procedurat kontraktuale të zhvilluara nga institucioni. Në të dyja rastet kërkesat janë marrë me shkrim dhe përgjigja është dërguar me shkrim brenda afateve dhe procedurave të parashikuara në rregullat e brendshme të institucionit dhe ligjit "Për informimin publik".

Raportime mbi punën e FSHZH-së janë bërë në mediat Top Channel, Klan Tv, ABC News, News 24, Report TV, RTSH, ATSH, Monitor, Gazeta Shqiptare, Panorama, Shqiptarja.com, Express, etj. Një informacion më i detajuar mbi artikujt sipas temave gjendet në tabelën më poshtë:

Monitorimi i mediave për periudhën Korrik – Dhjetor 2017

Nr.	Projekti	Referime në media
1.	Lalëz - Bizë - Draç	2
2.	Masterplani i Alpeve	19
3.	Projekti i Lumit të Vlorës	16
4.	Rruga Cërrik - Belsh - Kuçovë	3
5.	Rruga Repts - Fushë Arrëz	7
6.	Ujësjetllës Çermë - Tërbuf - Sulzotaj	1
7.	Unaza e Re e Pogradecit	5
8.	Investimet në fshatrat e bregdetit	5
9.	Qendra e Pukës/Liqeni i vogël	2
10.	Kastriot-Arras/Unaza e re Dibër	3
11.	Shkodër – Velipojë Vau i Dejës	5

Konsultime Publike

Komunikimi po bëhet shumë i rëndësishëm edhe për zbatimin e projekteve. Konsultimet publike kanë qenë një instrument që ka rezultuar mjaft efikas përse i përket ndarjes së informacionit me publikun mbi projektet e reja që fillojnë, objektivat dhe rezultatet e pritshme. Njëkohësisht konsultimet publike janë përdorur si instrument edhe për të marrë input-e nga grupet e ndryshme të interesit lidhur me një projekt apo me aspekte të caktuara të tij (p.sh: ndikimi në mjedis, impakti social, etj.) Gjatë 3 muajve të fundit janë organizuar 3 konsultime publike pranë komuniteteve të prekura nga projektet. Njoftimi për konsultimet publike është shpërndarë nëpërmjet platformave sociale, e-mail-it, materialeve të printuara dhe ftesave të shpërndara pranë komunitetit në bashkëpunim me njësitë administrative ku veprojnë projektet. Në çdo rast është hartuar informacion që ka paqyruar çështjet e diskutuara në takim, input-et e pjesëmarrësve dhe konkluzionet. Ky informacion është pasqyruar në ëbbsite-in e institucionit dhe në platformat sociale.

Platformat sociale

FSHZH është aktive në platformat sociale Facebook, Instagram dhe Youtube. Faqja e Facebook-ut të institucionit ka arritur në rreth 9,800 ndjekës, ndërkohë që vihet re një rritje e ndarjes së postimeve nga institucione të tjera qendrore dhe lokale, si dhe nga agjenci të tjera.

Është komunikuar kryesisht me materiale audio-vizuale. Vetëm gjatë 3 muajve të fundit të vitit janë përgatitur 29 video nga të cilat 15 janë bërë publike. Një pjesë e mirë e postimeve rishpërndahen nga partnerë dhe institucionet financuese, çka rrit vizibilitetin dhe audiencën. Vëmendje u është kushtuar edhe komentuesve të ndryshëm, të cilët kanë marrë përgjigje për pyetjet apo kërkesat e drejtuara.

Përdorimi i platformave sociale ka rezultuar mjaft i suksesshëm në nxitjen e kuriozitetit të mediave për t'u njohur më nga afër me projektet e FSHZH-së, ç'ka e


vendos institucionin në një pozicion të favorshëm pasi nuk ka nevojë të kërkojë vëmendje.

Kanali në YouTube i FSHZH-së është riaktivizuar dhe përditësuar. 22 video të reja janë publikuar në këtë kanal gjatë 2017-ës.

Një info më e detajuar lidhur me përdorimin e mediave sociale si instrument më poshtë:

Ndjekësit e faqes


Aktualisht numri total i ndjekësve të profilit zyrtar të Fondit Shqiptar të Zhvillimit ka arritur në rreth 9,800 ndjekës. Grafiku më poshtë paraqet se si është rritur ky numër prej fillimit të vitit 2017 e deri më tani.




Gjatë gjithë vitit vërehet një tendencë në rritje e numrit të ndjekësve. Një rritje e ndjeshme e numrit të ndjekësve daton në muajin korrik, me mbi 1K ndjekës të rinj. Tendenca në rritje është ruajtur përgjatë gjithë vitit, ndonëse me një rritje më të ngadaltë se sa boom-i i muajit korrik.

Grafiku në vijim paraqet numrin neto të ndjekësve, që do të thotë se merr në konsideratë jo vetëm ndjekësit e rinj, por edhe ata ndjekës që kanë vendosur të largohen. Përgjatë muajve qershor-korrik vërehet se numri neto i ndjekësve është rritur ndjeshëm, me një rritje të fuqishme të numrit të ndjekësve të rinj dhe një numër mjaft të ulët të atyre që shkëputen. Po ashtu, një tjetër rritje e konsiderueshme vihet re përgjatë muajit nëntor. Një rritje e qëndrueshme, ndonëse me hapa të ngadaltë, vihet re gjatë gjithë vitit.


Ndjekësit neto



Personat e arritur




Numri total i personave të arritur



Vihet re se fillimi i gjashtëmujorit të dytë të 2017 ka sjellë një rritje të numrit të personave që janë arritur nëpërmjet postimeve të realizuara në faqën e facebook-ut. Rritja është e qëndrueshme dhe ka vazhduar përgjatë gjithë muajve në vijim, duke kaluar nga një mesatare prej 554 personash të arritur për gjashtëmujorin e parë, në 2,041 për pjesën tjetër të vitit.

Numri total i shikimeve



Grafiku më sipër paraqet kurbën e shikimeve, duke na treguar se muaji shkurt e veçanërisht muaji qershor kanë qenë ata me shikueshmërinë më të lartë të faqes. Në muajt në vijim, shikueshmëria ka qenë më e ulët, por është ruajtur një numër i qëndrueshëm shikimesh, me një tendencë rritëse në tremujorin e fundit.

- **Faqja zyrtare e web-it**

Website-i zyrtar i FSHZH-së pasqyron informacion lidhur me projektet në zbatim, por edhe mbi projektet e përfunduara tashmë.

Risia e fundit të vitit 2017 është se në këtë website kanë filluar të pasqyrohen edhe studimet apo planet e zhvillimit të hartuara nga FSHZH.

Për projekte të caktuara, varësisht nga kërkesat e donatorit janë krijuar nënfaqe të cilat ofrojnë informacion mbi projektin përkatës, akses në dokumente për të cilat grupet e interesuara publike kanë nevojë, lajme dhe njoftime. Informacioni ofrohet në shqip dhe anglisht. Nisur nga intensiteti i projekteve dhe nevoja në rritje për transparencë dhe komunikim me publikun, mbetet për t'u shqyrtuar mundësia e ndërtimit të një website-i të ri me dinamik dhe më interaktiv.

11.3 Monitorimi dhe Vlerësimi

Gjatë vitit 2017, ka vijuar puna për monitorimin e ecurisë së projekteve kryesore në zbatim nga FSHZH. Puna për monitorimin e tyre ka konsistuar në marrjen, vlerësimin dhe raportimin e të dhënave dhe treguesve kryesore të ecurisë, duke përfshirë avancimin teknik dhe atë financiar. Me kërkesë të donatorëve, ministrive të linjës dhe të interesuarve të tjerë janë përgatitur raporte periodike dhe informacione që lidhen me ecurinë dhe indikatorët e performancës.

Puna për monitorimin dhe vlerësimin e projekteve është fokusuar në dy drejtime kryesore:

- Ndjekjen, monitorimin, raportimin dhe vlerësimin e projekteve në zbatim dhe atyre që janë drejt përfundimit;
- Përgatitjen e kuadrit të monitorimit dhe vlerësimit të projekteve që sapo kanë filluar apo pritet të fillojnë;

Në kuadër të mbylljes së Programit të Rrugëve Dytësore & Lokale, janë përgatitur raportet përfundimtare për financimet nga EBRD, EIB, IPA 2010-2011, IDB dhe u janë dërguar donatorëve. Ndërkohë vijon me intensitet puna për mbylljen e vlerësimit të impaktit të këtij programi.

Njëkohësisht është ndjekur ecuria e projekteve “Fondi i Investimeve Sociale IV”, “Furnizimi me Ujë i Zonave Rurale III”, “Fondi i Zhvillimit të Rajoneve”, “Punët në Komunitet IV”, Projekti i Rehabilitimit të Segmenteve Rrugore Prioritare. Monitorimi bazohet në treguesit periodikë të komponentëve kryesorë të projekteve duke i krahasuar me planet e punës.

Në kuadër të përgatitjes së monitorimit dhe vlerësimit të projekteve që sapo kanë filluar nga puna apo pritet të fillojnë, një vëmendje e veçantë i është kushtuar Projektit për Zhvillimin e Integruar Urban dhe Turistik dhe Projektit të Rrugëve Lidhëse Rajonale.

Viti 2018 shënoi dhe përfundimin e studimit të vlerësimit të impaktit të Projektit ‘Përmirësimi i Rrugëve Dytësore dhe Lokale’. Gjetjet e këtij studimi janë impresionuese dhe rikonfirmojnë suksesin e këtij projekti edhe për përfitimet socio-ekonomike që ai ka sjellë.

11.4 Auditimi i brendshëm

Njësia e Auditimit të Brendshëm, zhvillon aktivitetin bazuar në planin vjetor të auditimit të miratuar në Këshillin Drejtues, në programet e aprovuara për çdo mision auditimi si dhe standardet kombëtare të auditimit dhe praktikën profesionale të auditimit të brendshëm.

Gjatë vitit 2017, Njësia e Auditimit të Brendshëm ka realizuar:

- Raportimin vjetor në Këshillin Drejtues të veprimtarisë së Auditimit të Brendshëm të ushtruar në Fondin Shqiptar të Zhvillimit për vitin 2016.
- Plani strategjik për vitet 2017-2020 si dhe planin vjetor i Auditimit të Brendshëm për vitin 2017.
- Misionin e auditimit me temë: “Vlerësimin e fazës së zbatimit të punimeve civile të objekteve të financuara nga Qeveria Shqiptare nëpërmjet Fondit të Zhvillimit të Rajoneve.
- Misionin e auditimit me temë: “Vlerësimi i fazës së zbatimit teknik dhe mirëmbajtjes së nënprojekteve të programit të Rrugëve Dytësore dhe Lokale të financuara nga marrëveshja e financimit me IDB & Istisna.
- Misionin e auditimit me temë “Vlerësimin e sistemit të menaxhimit të projektit për Zhvillimin e Integruar Urban dhe Turizmin, të financuar nga Banka Botërore”.
- Misionin e auditimit me temë “Vlerësimi i fazës së plotë të projektit të Lumit të Vlorës të financuar nga Fondi Kuvajtjan”.
- Misionin e auditimit me temë “ Vlerësimi i projektit të Furnizimi me Ujë i Zonave Rurale III”, financuar nga KfW, IPA 2013 dhe Qeveria Shqiptare”.

Nga auditimet e kryera në projektet e mësipërme NJAB konstaton se struktura e re organizative e FSHZH ka krijuar mjedisin e duhur të kontrollit të brendshëm për menaxhimin më të mirë të projekteve, për angazhimin dhe rritjen e përgjegjësisë së stafit në arritjen e objektivave dhe krijimin e potencialeve për absorbimin e projekteve të reja nga donatorë potencialë.

Njësia e menaxhimit të PZHIUT, ka ngritur tashmë sistemin e brendshëm për menaxhimin e projektit, janë hartuar planet e duhur për menaxhimin e projektit, është miratuar manuali operacional i projektit dhe janë ndërtuar mjetet e duhura të komunikimit me të gjithë aktorët dhe faktorët që përfshin ky projekt.

Projekti i Lumit të Vlorës ka siguruar një performancë të mirë në fazën fillestare të realizimit të lotit të parë të projektit, ku vazhdojnë punimet në përputhje me kalendarin e parashikuar të punimeve.

Nga analiza dhe vlerësimi teknik dhe financiar i projekteve, NJAB konstaton se FSHZH ka implementuar me performancë të mirë projektet në proces zbatimi, duke siguruar zbatimin korrekt të Marrëveshjeve të Financimit, të kriterëve të vendosura nga donatorët dhe Qeveria Shqiptare. Punimet civile përgjithësisht janë realizuar në përputhje me kushtet e kontratave të punimeve civile, specifikimeve teknike apo kërkesave sipas kontratës FIDIC. Janë nënshkruar Marrëveshjet e Investimit dhe Marrëveshjet e Funkcionimit & Mirëmbajtjes me NJQV-te aseteve përkatëse para fillimit të zbatimit të projektit. Sistemi i raportimit ka siguruar dhënien në kohën e duhur, në mënyrë të plotë e të saktë të informacioneve dhe raportimeve përkatëse si donatorëve ashtu dhe Qeverise Shqiptare.

Për mangësitë dhe problematikat e konstatuara gjatë auditimit, NJAB mbasi ka vlerësuar nivelin e riskut dhe masën e ndikimit të tyre në objektivat e institucionit ka lënë rekomandimet përkatëse të cilat synojnë në forcimin e mjedisit të kontrollit të brendshëm dhe rritjen e efektivitetit të sistemit për prokurimin e fondeve publike. Zbatimi i rekomandimeve po monitorohet dhe konstatohet impenjim i strukturave të FSHZH-së në zbatimin e tyre.

11.5 Misione të donatorëve

- **Misione të Bankës Bankës Botërore në kuadër të Projektit për Zhvillimin e Integruar Urban dhe Turizmin**

Misioni i parë është kryer gjatë periudhës 3 - 7 Prill 2017;

Misioni i dytë është kryer gjatë periudhës 14 - 22 Shtator 2017;

Objektivi kryesor i këtyre misioneve ishte shqyrtimi i progresit të përgatitjes së paketës së investimeve “fast track” dhe zbatimi i komponentëve të tjerë të projektit. Pjesë e diskutimeve ishin edhe përgatitja e Manualit Operacional, çështje të lidhura me rritjen e efektivitetit të projektit, ecuria e studimeve të dizajnit urban në bashkitë e përzgjedhura.

Gjatë këtyre misioneve u zhvilluan takime me stafin e FSHZH, bashkitë përfituese dhe aktorë të tjerë. Njëkohësisht u zhvilluan edhe vizita në terren për të parë nga afër objektet që do të financohen në kuadër të projektit.

Misionet konstatuan progres të konsiderueshëm në aktivitetet e projektit dhe vlerësuan maksimalisht angazhimin e FSHZH në rolin e agjencisë zbatuese të projektit.

- **Misione të Bankës Bankës Botërore në kuadër të Projektit të Rrugëve Lidhëse Rajonale**

Misioni i parë është kryer gjatë periudhës 3 - 13 Prill 2017;

Misioni i dytë është kryer gjatë periudhës 24 - 31 Korrik 2017;

Misioni i tretë është kryer gjatë periudhës 24 Tetor - 3 Nëntor 2017;

Objektivi kryesor i këtyre misioneve ka qënë diskutimi mbi iniciimin dhe ecurinë e fazës përgatitore të këtij projekti të ri, i cili do të kontribuojë në përmirësimin e rrjetit rrugor rajonal në Shqipëri. Në fokus të këtyre diskutimeve ishte progresi i bërë në lidhje me procesin e krijimit të bazës së të dhënave për rrugët potenciale, vendosjen dhe miratimin e kriterëve të përzgjedhjes së rrugëve që do të financohen. Njëkohësisht u diskutua edhe mbi hartimin e dokumentave strategjikë të projektit, skemën e menaxhimit financiar, dokumentacionin e masave mbrojtëse mjedisore dhe sociale, aspektet e monitorimit dhe vlerësimit të projektit, etj. Misionet konkluduan se është bërë një punë shumë e mirë për fazën përgatitore të projektit e cila do të finalizohet me miratimin e tij në Bordin e Bankës Botërore në pranverën e vitit 2018.

Gjatë këtyre misioneve u zhvilluan takime me stafin e FSHZH, përfaqësues të qeverisjes vendore dhe aktorë të tjerë. Misionet zhvilluan edhe vizita në terren për të parë nga afër objektet që do të financohen në kuadër të projektit.

- **Misione të KfW në kuadër të Programit të Ujësllësave Ruralë**

Misioni i parë është kryer në muajin Maj 2017;

Misioni i dytë është kryer në muajin Qershor 2017;

Misioni i tretë është kryer në muajin Korrik 2017;

Qëllimi i këtyre misioneve ka qënë vlerësimi i Programit SIF IV, ecuria e programit Furnizimi me Ujë i Zonave Rurale faza III dhe përgatitja e programit Furnizimi me Ujë i Zonave Rurale faza IV.

Gjatë këtyre misioneve u organizuan takime me stafin e FSHZH-së dhe aktorë të tjerë. Njëkohësisht janë organizuar vizita në terren për të parë nga afër ecurinë e deritanishme të projekteve në zbatim. Misionet vlerësuan mjaft pozitivisht progresin e bërë nga projektet duke theksuar se janë realizuar më së miri objektivat për të cilat ato janë financuar. Në këtë kuadër, KfW vlerësoi pozitivisht performancën

institucionale të FSHZH, dhe rezultatet e Programit SIF IV. Në tërësi zbatimi i programit u vlerësua “Satisfactory”, duke i hapur rrugë financimeve të reja në sektorin e ujësjellësive ruralë. Rezultat i këtij angazhimi është propozimi për fillimin e fazës IV të Programit Furnizimi me Ujë i Zonave Rurale, i cili parashikon ndërtimin e ujësjellësit të Bashkisë Himarë.

- **Misione të Fondit Kuvajtian dhe Fondit Saudit për Zhvillim në kuadër të Projektit për Rikonstruksionin e Rrugës së Lumit të Vlorës.**

Gjatë muajit Tetor 2017, përfaqësues nga Fondi Kuvajtian dhe Fondi Saudit për Zhvillim, vizituan Shqipërinë me qëllim diskutimin e çështjeve të lidhura me ecurinë e projektit. Gjatë këtyre misioneve u organizuan takime me stafin e FSHZH-së dhe aktorë të tjerë. Misionet konstatuan progres të konsiderueshëm në aktivitetet e projektit dhe vlerësuan maksimalisht angazhimin e FSHZH në rolin e agjencisë zbatuese të projektit.

12. AKTIVITETE TE TJERA

12.1 Bashkëpunimi rajonal

Gjatë vitit 2017, FSHZH duke e vlerësuar bashkëpunimin rajonal esencial për një zhvillim të qëndrueshëm, është angazhuar në programe të bashkëpunimit ndërkufitar, duke i konsideruar si një mundësi integrimi me strukturat homologe europiane, përqasjen e standardeve në fusha me rëndësi për zhvillimin si turizmi, kultura, inovacioni etj.

Gjatë tremujorit të fundit 2017, FSHZH ka aplikuar në thirrjen tematike të programit trilateral IPA CBC Itali - Mali Z i - Shqipëri, me dy projekte prioritare për të mundësuar lidhjen mes Ulqin dhe Velipojës si dhe Zogajt me krahinën e Krajës në Malin e Zi. Këto projekte parashikohet të kenë një impakt shumë të rëndësishëm në zhvillimin ekonomik dhe turistik të këtyre zonave me potencial të madh zhvillimi.

Gjatë kësaj periudhe FSHZH ka bashkëpunuar ngushtë me Departamentin e Zhvillimit dhe Ndhmës së Huaj në Kryeministri dhe Ministrinë e Integritimit në përgatitjen e një sërë aplikimesh në fushën e transportit (rrugët dytësore dhe lokale), ujësjellësa, si dhe në sektorin e Turizmit, në kuadër të instrumentit WBIF dhe përfshirjes në NSPP. Këto aplikime janë të orientuara drejt përmirësimit të konektivitetit rajonal dhe investimeve të integruara urbane e turistike në zonat ndërkufitare.